

# 那年玩社，四位靚女

作者: Jenmen

Powered by [紙言](#)

# 序

校園生活，點解永遠都係咁難忘？

係因為溫書溫到通頂？

係因為同同學上堂訓教、傳紙仔、抄功課、屌老師？

係因為玩學會搞活動識好多新朋友？係因為放學後跟埋班死黨去街場打波，挑隔離學校機？

係因為恰班低form bb仔好過癮？

係因為狗公新黎既大波miss？

對我，康洛文黎講，通通都唔係。

因為我那年玩社，有四位靚女。

諗番起嗰陣時既日子，真係好正。

自我介紹下先，我叫康洛文，嗰年我16歲，讀緊 form 5，啱啱由一間港島名校（唔係做人不要太）轉去另一間新既學校--屯門涼糖清夷紀念中學。話說當年特首夫人涼糖清夷生cancer瓜左，涼特首同啲富豪為左紀念佢，就起左呢間新學校。

你可能會問：好好地讀緊名校，點解我會係嗰年轉校？

唔怕同你講，我係一條公認嘅麻煩友黎。即使我成績有幾咁出眾，考過幾多次第一，過過幾多次九成都好，我既操行從來冇突破過丙。日日放左學就係同隔離學校啲學生口角，繼以動武。年年都比人記缺點、記小過，最後記大過。好彩我成績係校內係數一數二，先未比人踢出校。但係嗰年，某一日放學之後，我如常咁同隔離學校啲學生打交。不過今日有啲唔同，就係班友仔call馬，我嘅對手唔再係一兩個人，而係七個。

七個，鬥一個。

十四隻手，鬥兩隻。

德國，鬥巴西。

仆你個街點打呀！

當我正想走既時候，先發現我已經無路可退，因為七個人已經將我圍住。

無計，要頂硬上。

我一拳打落其中一個學生塊面度，突然佢跌左落地，仲不斷大嗌隻腳好痛。李華度黎既喂！

依個時候，佢班 friend 即刻指住我，仲話我打傷左佢，要打999 call 猶太人。

「喂你唔好屈得就屈啲！我打佢塊面，佢話隻腳好痛？冇野呀化？」

「總之你宜家就係打傷我地個 friend！」

擾攘左一陣，猶太人黎左，帶曬我地番差館錄口供。所有野搞掂囉，猶太人叫我地走，遲啲再搵我地

。

第二日我照常番學，訓導兼我既老朋友麥sir叫我去自修室。

其實我都估到咩事，但係循例都要問一問：「阿麥sir，咩事。」

「文仔，琴晚訓導組開左個特別會議，關於琴日你同史佛恆班人打交件事。本身我都想保你，但係事態嚴重，連校長都介入。所以全體老師一致通過，記多你一個大過，宜家冇quota剩，你要走。」

我知我隨時有一日會比人踢出校，所以我一早有曬心理準備，但係聽到依個消息，我都係有少少sad。

「麥sir，點都好，多謝你……」

「哇，好彩得我地兩個咋，男人老狗比人睇到自己喊，好療架。」

「其實宜家科技咁發達，你想搵我聚舊既話，咪打個電話比我，或者 send 個 whatsapp 比我囉。我反而擔心有冇學校收你，話曬你個底咁花，唔係間間學校都肯收你架……」

個日開始，我就開始搵學校。但係真係比麥sir講中左，間間學校見到我咁難搞，都即刻拎頭 say no。搵多兩搵，我都有啲灰心，準備可能出黎做野，又或者去外國讀書。

不過，皇天不負有心人，一間學校竟然肯收我。

「咩話？涼糖清夷中學？」

聽都未聽過，係火星㗎？

「係呀，係一間新中學黎架。阿仔呀，難得人地肯收你，唔好周圍搞事啦。」

「得啦得啦。」呀媽係就係煩左啲，但係佢講得冇錯，機會真係好難得。於是我決定唔再打交，真係認真讀書。

就係咁，我嘅人生有咗一個大改變。

---

20XX年9月1日，

一個我呢一世都唔會忘記嘅日子。

我個陣時住係元朗村屋，所以番位於屯門嘅涼糖清夷中學唔算好遠。以前我麻麻住屯門兆麟苑，我細個周不時都會入屯門搵佢，所以我對屯門都叫做熟悉。至少，我識搭輕鐵。

我6點鐘起身，着起白色恤衫、灰色長褲，一套整齊嘅校服。

講起校服，涼糖清夷嘅校服普通到冇得再普通，而女仔嘅校服就係一條白色長裙，加條帶，完。

搞掂曬所有野之後，我6點50分出門口，7點鐘上輕鐵，展開番學嘅旅程。

車門一開，差唔多一百人湧上本身已經好狹窄嘅輕鐵車廂，令到車廂猶如密閉空間，連我坐係到都差啲抖唔到氣。

一個身穿白色長裙，扎住條馬尾嘅女仔跌跌撞撞咁入左車廂，泛紅嘅臉頰令佢係人羣中更加突出。最令人驚喜嘅係，佢冇玩手機，而係溫緊書。

點解我會咁注意依個女仔？

( 我知，佢係主角呀嗎！ )

錯，大錯特錯。雖然佢真係主角，但係其實係因為佢嘅攻擊性武器--oh sorry，係胸前嘅涼糖清夷校章。

少女經過一輪混戰之後，終於搶到我隔離嗰個十分寶貴嘅座位。佢搶到座位個陣時，列車已經駛到何福堂站，距離目的地安定站得番幾個站。

少女一坐低，就問：

「咦？你都係讀涼糖清夷？」

「係呀。」

「Form 幾？」

「5。」

「吓？你咁生面口既？」

「我係今年喺XBS轉校過黎嘅，所以你未見過我都好正常。」

「XBS? 啱係嗰間學生好勁，facilities 超先進嘅港島名校？」

「你喎。」

「咁你應該好勁架喎，點解你要轉校過黎？」

「有機會再同你講，我有啲眼瞓。」

「懶係神秘咁。」

「咁你想我講啲咩？講下我係XBS啲嘢？我驚你唔想聽姐。」

「我都有興趣，我希望你唔好做人太咩姐。」

「哦。」

我注意到佢手上面攤住份厚疊疊嘅中史notes。

「乜你修中史㗎？睇唔出喎。」

「係呀。咁唔知你睇唔睇得出我曾經係中史全級第一？」

「又真係睇唔出喎。」我偷笑咗一下。

「係喎，咁你修咩科？睇你個樣，肯肯定係修physics。」我唔知佢係點樣從我個樣得出我讀physics呢個結論，總之我唔係讀phy。

「比你挑通眼眉，但係都係唔夠我嚟。小弟其實係中史geog加econ嘅。」

「估唔到，你都係中史jj。你掂唔掂㗎？」

「喺，我全身上下到到都掂，包括我個腦。中史？XBS咁多年嚟無人夠我嚟！」

跟住我地再傾左一陣，原來少女叫做張依韻 Yvonne Cheung，之前讀另一間中學，但係舊年學校比人強制拆卸起豪宅，當時引發過幾大爭議，仲有人係學校示威；但係政府無動於衷，所以最後大家都冇左件事，而 Yvonne 同佢班同學就逼於無奈，要黎呢度讀書。由於成個 form 除左我之外都係由 Yvonne 以前間學校轉過黎讀，所以 Yvonne 知道我讀 form 5 之後先會咁驚訝，我竟然係難得一見嘅新同學。

「dododododo.....」輕鐵到達安定站，係時候番學校。但係 Yvonne 話要去買包當早餐，我望一望手錶：

7:45，未遲到。

眨眼間，Yvonne 已經消失係我眼前。

我地之間第一次見面，就此結束。

由輕鐵站行去學校只係需要10分鐘，慢慢行都唔洗驚。

涼糖清爽中學比我嘅感覺就係一座好乾淨既六層高建築物。入面有兩個標準籃球場，附近有一個足球場，仲有一個小花圃。總之就係好新淨。

我望向操場。咦？做咩咁多人係嗰度？

我行埋去睇下，原來係分班結果。其實基於某個特別原因，我已經一早知道自己讀咩班，但係就冇特別睇下其他同學嘅名，不過我記得我果班好少人，好似得十幾個人。橫掂仲有時間，不如順便宜家睇下。

#### 5B班

陳莉曦 Chan Li Hei

張依韻 Cheung Yee Wan Yvonne

方幼儀 Fong Yau Yi

郭玲玉 Kwok Serena Ling Yuk

莫嘉瑜 Mok Ka Yu

楊曉琳 Yeung Hiu Lam

白文翰 Bak Man Hon

陳天元 Chan Tin Yuen

陳偉賢 Chan Wai Yin

康洛文 Hong Lok Man

顧顯融 Koo Hin Yung

申屠子成 Shentu Zhicheng

原來 Yvonne 係同我一班，不過咁都好，至少班上面有一個識嘅人，識其他同學都快啲。

By the way，除左睇同學之外，睇埋自己係咩社都好重要。係開學之前，我都做左少少基本嘅 research，知道原來涼糖清爽會有四個唔同嘅社（紅、黃、藍、綠），而且都會有幾多社際活動玩。

但係畢竟係第一年，所以詳細情形我都唔清楚。我亦都唔抱太大希望。

我再望望分班結果，先發現原來係我地嘅英文名後面有一隻英文字母，代表我地所屬嘅社。睇下先：

5B班

陳莉曦 Chan Li Hei R

張依韻 Cheung Yee Wan Yvonne R

方幼儀 Fong Yau Yi B

郭玲玉 Kwok Serena Ling Yuk R

莫嘉瑜 Mok Ka Yu G

楊曉琳 Yeung Hiu Lam G

白文翰 Bak Man Hon B

陳天元 Chan Tin Yuen R

陳偉賢 Chan Wai Yin Y

康洛文 Hong Lok Man R

顧顯融 Koo Hin Yung G

申屠子成 Shentu Zhicheng Y

R，即係Red 紅社啦，唔錯。

咦，乜Yvonne又係紅社？

可能呢啲，就係叫做緣份。

「叮噹叮噹……」鐘聲響起，夠鐘上禮堂聽校長廢喻。

「……祝各位同學係新嘅一年可以愉快咁學習，多謝。」

校長廢喻完畢。係之前嘅20分鐘，我好頑強咁保持清醒。但係我隔離嗰條友仔，就訓到流口水，唔係我嗌醒佢，睇怕佢開學第一日都要見見訓導。

「呵欠~ 完啦？多謝你啊兄弟。」

「唔洗。喂大佬，我明嘅，校長講啲野真係好悶下，但係你都唔好咁「明張目膽」咁訓呀，始終訓導見到就唔係幾好……」

「得啦，小弟呢方面經驗豐富，黎到新學校都冇冇怕！係啲，見你咁生面口，斷估唔係舊學校個邊轉嚟掛？傾左咁耐，都未知你叫咩名添。」

「姓康叫洛文。」

「陳天元。」

行樓梯既時候，陳天元同我講左好多同學之間嘅關係，令我都可以盡快融入呢到。之後嘅日子，我可以咁快同新同學打好關係，都真係要多謝佢。

「各位同學早晨」

「乜老師早晨」

唔係老作，百家姓都有「乜」字

打完招呼之後，到左最殘酷嘅時候--分編座位。「各位同學，我就求其排位，唔好介意呀。」

黑板

第三行	第二行	第一行
方幼儀	張依韻	莫嘉瑜
顧顯融	陳天元	康洛文
楊曉琳	陳莉曦	郭玲玉
陳偉賢	申屠子成	白文翰

「喂洛文，我地又見面喇！」

「係呀陳天元，見你應該好過見其他人。」

坐我前面莫嘉瑜聽到我咁講，即刻話：「Wow，XBS仔一入到黎，就同天元搞gay，果然係好基--」

「屌，咪聽人亂講。」實係 Yvonne 爆料。我望一望 Yvonne，佢細細聲咁同我講：「係我呀，點呀？」

算啦，俾人笑一陣姐。不過講真，陳天元呢個人比我嘅感覺十分之好，我應該可以好快同佢打好關係。

你地有冇諗過，點解我無啦啦要同佢打好關係？

因為，我睇中左佢嘅孖生細妹陳莉曦。

其實，我頭先校長廢喻環節，我可以勉強保持清醒，係因為佢坐咗係陳天元隔離。天元全程耷低頭訓覺，我可以好清楚望到佢個妹，望到佢上半身。雖然佢個樣未算得上係天使臉孔，但係佢就絕對係魔鬼身材。雖然我只係識左佢15分鐘，甚至有傾過計，但係我已經幻想緊佢用佢既32C夾住我嘅巨龍。

「係呢阿Sky哥，你呀妹有冇男朋友？」

「有，咪係坐第二行最後個個申屠子成囉。點呀，你想媾我個妹？」佢用一個唔係太友善嘅眼神望住我。



「唔係，純粹得意問下啫。」

唔.....有啲難度。

不過我有樣好，就係我同佢同社。既然有咁多社際活動，機會就一定有。

嗰晚，一個不知名嘅號碼add咗我入一個group。

456B精英齊奪星！！！！

12 members

天元突破:熱烈歡迎康洛文同志入gp！！

係嗰，今朝俾咗個電話俾陳天元，呢個應該係5B班group。個名有啲娘，但係都幾得意。

我求其打句開場白：「yo 大家叫我康文署就得」

~serena~: hi 名校仔arr

[足球]lrcyno.10: yo 港島名校大仆街

[心]CY: yo 港島名校大仆街

十年生死兩茫茫: yo 港島名校大仆街

我: 屌我唔係陳庭佳

metttchan: yo 港島名校大仆街

yukakom\*\*: yo 港島名校大仆街

成班友仔都幾仆街下，但係對比起喺所謂名校讀緊果啲「良好學生」，佢哋至少幾玩得，無太多心計。係呢度讀書，應該會安樂啲，唔需要日日顧忌太多。寧為雞口，不為牛後。

### 三

過左幾日之後，有個又係紅社既 Form 5 男仔搵我，佢叫鄧國燊。

佢既樣斯斯文文，講野都好有禮貌，佢應該就係呢間學校既學霸。不過講成績，呢度又會有邊個可以同我比較呢？

「係呢康同學，大家都知道你曾經係XBS度讀過書，相信你都係一個好傑出既人才.....」

Yvonne

Cheung，我真係屌你老母！全校都知我讀XBS，今次唔打到你變「易慌張」，都真係對唔住自己！

「.....其實我係今年紅社既社長，宜家搵緊同學擔任幹事。我覺得你係一個好適合既人選，唔知你有冇興趣呢？」

哦，做社幹事，咁就唔同喇，可以諗下.....

傾咗一陣間，我就接受咗佢嘅邀請。

「好，我都好希望參與社嘅活動，合作愉快。」

「多謝你，合作愉快。」

「Red Hse General Meeting 15/9」

「以下我地會介紹我地今年紅社內閣嘅成員，首先，係我地嘅社長 - 鄧國燊！」

佢向MC同台下嘅社員點一點頭。台下掌聲如雷。

「.....好啦，下一位就係我哋另一個committee member，5B康洛文！」

我揮手致意，十足十689。

「.....到左最後，就係5B陳莉曦！」

莉曦燦爛嘅笑容同佢個胸成為咗全場嘅焦點，狗公無一不拍掌。

冇錯，我做committee既其中一個原因，就係鄧國燊同我講，莉曦都會加入做committee。咁樣我就可以多啲時間係佢身邊，佢自然就會中左我既計...呀唔係，係接受我。

我諗深一層，唔係嗎，我頭先先串完台下果班為胸而生嘅狗公，但係我何嘗唔係望緊莉曦個胸？諗到呢度，我自己都有啲慚愧。

「唉，算囉，試下認認真真咁追佢！」

完咗 General Meeting，我哋所有紅社內閣成員去咗附近一間酒樓打邊爐，順便吹下水玩下無聊

game。

「唔係掛，玩 truth or dare? 咁白痴嘅 game，我中一之後就冇玩過咯啎！」

「喇，你有所不知啦洛文哥，truth or dare 呢，就係我哋新西人嘅傳統嚟，今次就俾你體驗下堅毅物種嘅傳統！」

「屌，咪玩我啦，我住元朗都未聽過有啲咁嘅傳統！」

「咁你玩唔玩先？」

既然莉曦都玩，算，玩一次。

「轉呀！！」支筆咁啱指住莉曦。

「啦曦姐，唔好介意呀，我想問你同申屠有冇做過？」我估唔到呢條問題竟然係一個女人，即係隔離班嘅陶子欣問嘅。全場起哄。

「乜你問啲咁嘅問題架？好難答。」莉曦一臉尷尬。

「有就有，無就無嫁啦！」

「冇呀。」

「真係冇？」

「真係冇。」大家聽到之後都幾意外。

「冇可能，申屠份人咁撻淫，邊有可能未同你做過？」

「好喇好喇，唔好再講啦我哋。」如果唔係我出嚟叫大家唔好講，相信班友仔全晚就會討論申屠子成同莉曦之間有冇扑過嘅話題。希望我呢句會係佢心中加到啲分。

嗰晚，我whatsapp咗莉曦。

「有冇野 咁樣比人講 有冇唔開心？」

好快，佢就覆咗我。

「咩嘢比人講？lol」

「頭先打邊爐嗰單」

「算啦 我冇所謂 [laughcry] 問唔中佢哋都會講下 冇乜嘢嘅 申屠都唔介意」

「係冇嘢至好」

「放心啦 anyway thx 多謝你咁關心我」

多謝我？唔通佢真係覺得我好？

## 四

等吓等吓，同莉曦吹過幾次水，增進下感情之後，終於到今年第一次社際比賽。話時話，雖然我叫洛文，但係我唔係Dennis Rodman，我反而鍾意踢波多啲。而呢一年第一個社際比賽，正正就係足球比賽。

開會既時候，鄧國榮對呢次比賽顯得好緊張，甚至連講野嘅方式都好似變左另一個人咁。

「喇，我地就要係聽日交報名表，如果唔係就會當棄權處理。我當然唔想我地第一次社際比賽就棄權，所以我地要快啲決定隊伍嘅名單。」

「社長，我地不如揀一啲冇入足球隊嘅社員啦！」我知道天元哥嘅潛台詞係「揀我」。身為足球隊隊員嘅佢，自然想有份玩。

「好！陳同學提出嘅意見真係有建設性！」講完之後，社長先生意氣風發，跟住離開左會議室。

冇幾耐之後，佢又返番黎，手上擺住張紙，仲話：「我頭先搵左足球隊嘅教練吳sir，佢比左張名單我。而我宜家已經有9個人選，因為我地今次比賽係7個正選加3個後備，所以我地仲爭一個人。」

聽到佢咁講，我feel到我嘅機會黎喇。

機會黎喇，飛雲！

「其實社長，我係XBS嘅時候都有入足球隊，仲係正選，只不過宜家我想專心係學業，先冇入到。我相信我技術冇退步到。」

「洛文哥，XBS足球隊好似係學界三連霸架喎！你仲要係正選添！你實冇問題！」

所以係適當嘅時候，有好似天元咁嘅人同你講好說話，係一件好事。

「係呀，上年學界精英賽決賽我入過一球，仲係MVP。」

「既然係咁，睇黎我地最強之人已在陣中。康同學，加油！」

第二日，學校門口附近嘅壁報版多左四張紙，而呢四張紙裏面，最令我注目嘅，除左係我個名之外，就係：

「黃社

·  
·  
·

No.10 申屠子成」

「萬眾期待嘅抽籤儀式即將開始！我地將會以抽籤決定兩場四強嘅戲碼！」

「第一支隊伍係.....紅社！」

「紅社嘅對手將會係.....藍社！」

「喂Sky，我唔太熟你地，我想問藍社足球勁唔勁架。」我問坐我隔離，一齊睇住抽籤嘅天元。

天元即刻除低佢副眼鏡，自信心爆棚：「放一百萬個心！唔好唔記得紅社有我」

足球隊嘅人啤一啤佢，天元自然洩一洩底。「一同你，仲有其他足球隊嘅精英，再加上藍社本身實力唔強，所以入決賽，應該無難度！」

「咁我就聽你講，放足一百萬億個心囉嗰。」

兩日後。

「45,46...」

「唔掂啦文哥！放過我啦！」

「唔係呀嗎？仲話自己足球隊精英，連50下掌上壓都做唔到？」「我真係頂不順啦，我唔係XBS出黎呀嗎！」

「唉，算啦算啦，今日到此為止啦。」「謝主隆恩！」

其實，我真係有啲擔心，擔心我嘅大計會因為比賽而失敗。

終於，到比賽日。

「各位觀眾！今年社際足球比賽第一場準決賽，藍社對紅社即將開始！都咪話唔期待呀！」

學生會評述係賽前嘗試帶動氣氛，而睇黎佢都十分成功，同學都唔理附近友愛嘅熱心街坊，落力打氣。

望住班同學幫我地打氣，我諗番起以前係XBS嘅經歷。講真，以前邊撚個會理課外活動？個個淨係識讀書，番屋企就做功課。我唔係話讀書呢樣嘢唔好，只不過咁樣讀，遲早都會死。所以黎到涼糖清爽，雖然佢地讀書唔算好叻，但係佢地嘅生活肯定比嗰班所謂「未來精英」更加多姿多彩，亦都會更加開心。至少，佢地知道，生活係唔止讀書，仲有好多好寶貴嘅野。

「ok未？」「ok啦球證。」

「擘---」

紅社鬥藍社，正式開始！

我今日打中場中，前鋒有唔係幾識入波嘅陳天元，左右兩個中場就係中三孖寶---莫錦佳同黃展賢，仲有後衛陳振銘同梁志仁，而龍門就係文以立。除左我之外，全部都係足球隊嘅人！

對面嘅人我唔係幾識，不過有一個我一定認到，就係我嘅同班同學白文翰。睇佢個樣斯斯文文，估唔

到佢係打龍門！睇佢個樣就有姿勢，唔知有無實際？

講多無謂，踢波最實際。一開波，天元驚驚青青，即刻回傳比我。我都知靠佢一定死，所以自己帶波向前，連扭過兩個球員，再比黃展賢。佢擺到波之後，簡直係無視防守，又爆兩個，仲帶左入禁區。黃展賢，爆佢！

「阿賢，波呀！」天元都趕得切入禁區，仲諗住擺波射！展賢都好大方，斬球靚波入禁區。不過，你就好人，信得過佢啫，我就信唔過喇！當陳生仲等波到嘅時候，我已經衝上前。蓄勢待發嘅我拉弓一射！

個波係禁區邊直飛楣底死角入網，白文翰都只可以做觀眾。如果阿叔仲在生嘅話，一定會大讚呢一球！

紅社啦啦隊即刻歡呼，為我呢一球吶喊助威。

入左一球，你問我夠皮未？梗係未！

35分鐘後，上半場完。紅社3-0藍社。其中兩球係我入嘅，包括一球罰球直入。而另外一球，就係陳天元入嘅十二碼，仲要係我博番黎嘅。上半場，簡直係我嘅表演時間。

既然上半場咁犀利，唔洗問阿貴，都知最後點啦，係咪？

「嘩---嘩-----」全場完。

紅社啦啦隊除左歡呼，就係大嗌：「6比0！」

我完成帽子戲法，而黃展賢亦得償所願，憑住佢嘅速度入左兩球。

唔好話看台上面其他三個社，就連我自己對呢個比數都有啲驚訝。雖說我對自己都有信心，但係兩邊實力差距真係未免太大。

Yvonne 趁我地啱啱坐低抖抖嘅時候衝左出黎，仲擺住一大堆嘢飲。

「各位精英中嘅精英，我都知你地踢左咁耐都好叻架啦，我就買左幾支嘢飲過黎，就當係我呢個啦啦隊長慰勞下你地，好冇？」

「多謝慌張姐！」

「.....嘩，呢支你嘅，呢支你嘅.....呢支，就係呀文嘅。」

咦？大支裝寶礦力嘞。

「喂！有冇搞錯！點解康洛文個支咁大嘅？」

「我支野係大啲架啦，你恨唔到架啦。」

呢個時候，Yvonne

突然一個微笑，令我地七個都呆左一陣。不過，我係最早醒嗰個，因為我知我嘅目標係邊個。

「做咩呀？慌張姐都吸？前世未見過女人呀？」「哈哈.....屌...」

正當我都笑埋一份嘅時候，我嘅後腦遭受到類似拳頭物體嘅襲擊。好撻痛呀屌...



## 五

比 Yvonne 打到有啲頭暈，行去隔離坐一坐，順便避一避佢，費事佢又再搞我。

「喂，你見點？我哋冇咗你唔得個啲！」原來莉曦坐咗係我隔離，仲問我有冇事。

「ok 啦，不過下次見到張依韻呢條友都真係要掉頭走。」

「哈，鬼叫你咁唔識講嘢咩。睇你個樣，咁唔識同女仔講嘢，你應該都係未出過pool架啦。」

「唔係，我A1嚟，但係個女仔轉咗校，我哋先散咗。」其實我係A0。

「估唔到啲。」

「唉，唔好再講喇。係啲，咁你呢？你就肯定1架啦，你以前仲有冇同其他人一齊過？」

莉曦突然變得好認真，「無呀，之前都冇，申屠係第一個，第一次有人咁傻，走去追我。」

「以前都有好多男同學想追我，但係我阿哥成日就喊打喊殺，啲人見到咁，都比阿哥嚇走晒。」

「但係申屠好唔同，佢好難得冇嚇親，最後連阿哥都話佢係好仔，可以放心比我同佢一齊咁話啲。」

聽到呢度，我都估唔到原來申屠子成係啲咁有毅力嘅人，睇嚟佢真係好鍾意莉曦。不過講到佢阿哥，我而家同佢阿哥熟到不得了，如果我要追莉曦，阿Sky可能會即刻批准。

「唔講咁多住，好似就快到下一場波，你去唔去睇？」佢問。

「梗係要。」

第二場社際足球比賽，黃社對綠社，亦都正式開始。紅社同藍社啦啦隊稍作休息，輪到黃社同綠社嘅表演時間。

而我所知，黃社有屯門區學界神射手申屠子成，的確應該較有勝算。但係相對場上嘅球員，台上嘅啦啦隊似乎遜色咗少少。

綠社啦啦隊聲勢浩大，全社用盡所有道具同口號，務求用聲浪拉近場上雙方嘅差距。佢哋啦啦隊嘅威力令其他社嘅同學都會停低睇一睇。

「綠社！綠社！We are Green！」企喺看台最前面，係啦啦隊其中一個隊長嘅，竟然係果日笑我基佬嘅莫嘉瑜！

佢換上啦啦隊制服，的確為佢帶嚟另一個形象。之前我都冇乜留意呢個坐我附近嘅同學，直到今日，我先可以有一個機會觀賞佢，同佢班社員嘅表現。認真，莫嘉瑜跳舞都ok。

講返場波先，唔知係咪怯於綠社啦啦隊初段嘅聲勢，黃社攻勢似乎欠缺組織，更加俾咗綠社一啲反擊機會，仲有一次，綠社爭啲就入一粒。但係過咗頭十五分鐘，黃社企穩陣腳，申屠又點會放過你班友

仔？

上半場完，申屠一球禁區外遠射，黃社一比零領先。

雖然上半場輸緊，但係綠社社員似乎並冇放棄，中場休息時間不斷打氣同舉banner，令球場真係有一種地獄主場嘅感覺。係「綠社奧脫福」！

莉曦見申屠身水身汗，即刻落去遞支水比佢。認真，我係有啲妒忌申屠，有莉曦咁樣嘅女伴，真係入多幾粒都制！

下半場，綠社繼續啦啦隊政策，再加上半場休息時教練比佢哋嘅指示，進攻即時變得更加流暢。

終於，佢哋嘅努力並冇白費。綠社10號黃英傑同8號譚兆倫做一個撞牆，然後扭過最後一個黃社防守球員，形成單刀局面！黃英傑輕鬆射入，一比一！

看台上邊，綠社社員震耳欲聾嘅歡呼，真係好有氣氛（同埋好嘈）。

但係，綠社並無開心得太耐。申屠開始發力，三分鐘內連入兩球頭槌，大演帽子戲法。綠社兵敗如山倒，最後輸一比三。

咁即係話，我哋決賽嘅對手，將會係黃社！

申屠，放馬過嚟！

## 六

綠社打得唔差，但係黃社有申屠，難免要輸。

綠社球員垂頭喪氣咁行返去看台，但係啦啦隊繼續打氣，唔講仲以為係綠社贏咗。莫嘉瑜走去幫班球員打氣。唔知點解，可能係我同情綠社，我走咗去綠社看台，幫莫嘉瑜手。

我係莫嘉瑜手上擺咗支水，比咗其中一個落場嘅球員。

「唔好傷心，你哋打得好好。」

「多謝你。你係咪藍社嗰個康洛文？」

「係呀，做咩？」

「應承我哋一樣嘢，要贏黃社。」

「傻啦，咁就係一定嘅，記得嚟捧場。」

我同佢寒暄完幾句之後，就諗住轉身返去。呢個時候，莫嘉瑜叫住我：「喂，康洛文！」

「突然咁有禮貌，你唔係叫我基佬嘅咩？」

「sorry囉，話時話咩，多謝你。」

「多謝我啲乜？」

「我以為你喺名校到讀，係個啲把口好撚串，成日踩到人哋一個仙都唔值個啲人。估唔到其實你都係個好人。」

「如果我真係嗰啲人，我就唔使嚟呢度讀啦，不過呢啲都係後話，遲下再講啦。」

「係嗎，康洛文，你整間得唔得閑？」唔係掛，嚟真架？

「得呀，做咩？」

「冇咩嘅...約你出去飲杯嘢姐。」

康洛文呀康洛文，掂嗎，唔駛自己出聲，冇女自己送上門！

雖然話我鍾情於莉曦，但係莫嘉瑜其實都係學校數一數二嘅好女仔。佢唔係最靚嗰個，但係矮矮細細又幾得意。佢份人好nice（對住我就例外），其實都係gfable。

「好呀，整間見。」

我要扮咩事都冇發生過咁行番去。

「喂，sky，我整間唔去練波，有嘢做，你哋自己練啦。」

「吓，哦，好呀。」佢又若無其事咁繼續whatsapp。

我執好嘢，發現莫嘉瑜已經係度等緊我。我暫時放低我對莉曦嘅傾慕，同嘉瑜一齊步出球場。

「你想去邊度？」我問。

「不如去starfucks？」

唔係掛，第一次約人出街去starfucks？又好似hea咗少少啫。

不過算啦，有個靚女陪住你，去邊度都差唔多姐。

我哋一齊搭輕鐵去市中心。佢坐係我隔離，全程都唔夠膽望住我，好似驚我一望住佢我就會殺咗佢咁。

去到starfucks，可能今日唔係假期，所以都好易搵位。我買咗杯cappuccino，但係佢淨係買咗支果汁！

我可以肯定，佢係諗唔到地方，先同我嚟starfucks飲嘢。

「喂，做咩搵我飲嘢。」

「其實，你都估到啦。」唔通真係估中咗？

「講啦，我唔知。」

「你係都要我講嘅！係呀，我真係幾鍾意你。你信唔信我第一日就鍾意咗你？」

一個靚女竟然對我一見鍾情，我真係太遲鈍。

「即係，你想我做你條仔？哈。」而家搞到我好似蝦緊佢咁。

「係呀！我初頭以為你做人真係不要太啲啲，但係原來份人好好人。」

佢咁講，我真係好唔好意思。我只不過係周圍打交先比人踢出校，又點稱得上話好人。應該話，我只不過係有最基本嘅人性，有一班係名校讀嘅人，連最基本嘅人性都有。

「唔好咁驚啦，我幾時話要拒絕你姐？我真係估唔到，你係主動啲個。」

「咁，我哋可唔可以試下？」

我二話不說，將塊面貼近嘉瑜，然後錫落佢嘅咀唇上面。

係cappuccino嘅香味。

唔好意思，莉曦，我要放低你。

# 七

我一隻手攞住未飲完嘅cappuccino，另一隻手拖住嘉瑜白滑而溫暖嘅手，一齊離開starbucks。

「你開唔開心？」

「唔開心！但係我點都要拖住你！」嘉瑜似乎好享受拖住我隻手嘅時光。

我突然覺得，嚟咗呢間學校之後，太多嘢發生咗係我身上，無論係新嘅死黨，定係新（應該話係第一個）嘅女朋友，都帶比我好多改變。我好想快啲忘記我嘅舊生活，盡快迎接新生活。

「唔開心呀？咁你想做咩先開心啲？」

「嘻，講笑咋。有你係我身邊，乜都夠啦！」

估唔到我人生中竟然有咁幸福嘅時刻，仲要我隔離個係一個靚女。

「係喎，其實點解你會鍾意我？學校大把仔，你又睇中我？」

「你問埋晒呢啲問題，而家好唔想我同你一齊咩？」

女人啲嘢，真係問又死，唔問又死。

「嚟啦，認真答。我真係想知，你唔係貪我靚仔呀嘛？」

「你就想呀！我都唔知點解我會鍾意你！總之我就想同你係埋一齊啦！」

我用隻手捏住佢塊面，「乜都好啦，總之你而家無論點都好，都要跟住我架啦。」

行下行下，我哋都行咗過去巴士站。嘉瑜要搭巴士返屋企，我同佢唔同路，唯有講再見。當然，又要借啲意挨落我度，搞一輪先走到。

搭緊西鐵果陣時，我諗返起今日發生嘅嘢。太刺激，太幸福。我好希望咁樣嘅生活可以繼續咁維持落去。

返到屋企，訓咗落張床度，我不斷咁傻笑，因為嘉瑜實在太可愛。有佢做我女朋友，我心滿意足。莉曦？我唔應該再諗佢。我要好好享受嘉瑜帶俾我嘅嘢。

「阿仔，你傻咗呀？全晚係度笑，係咪病咗呀？」

「冇嘢喎阿媽，真係冇嘢。」

跟住個幾日，我都特別早起身，搭車去龍門居到接嘉瑜返學。

唔知係咪已經有人見到我哋一齊返學，我哋兩個拍拖嘅事開始係學校流傳，咁我哋除咗承認之外都有嘢好做。

「掂喎你，文哥！咁快就溝到女，睇嚟你都幾適應呢度嘅生活喎！」天元喺練波嗰陣，係咁提起我同嘉瑜啲嘢。

「你就好啦，冇莫嘉瑜，唔係，要改口做康太喇！」連F3仔黃展賢都知道件事，睇怕遲下連老師都會知。

對於佢咁嘅嘲笑，我通通只會回覆一句：「屌。」

因為綠社仲有一場季軍戰要打，所以嘉瑜都忙住搞啦啦隊啲嘢，所以每一日我哋只能夠係上堂時間親密一下。我隔離嘅陳天元都好識做 - 應該話係冇眼睇，瞓著咗。

上緊英文堂嘅時候，天元訓得最冧，嘉瑜都冇心機聽書，又撞正個英文呀sir係嗰啲唔係好理我哋，自己講自己嘢嘅老師，我哋先可以於入無人之境咁，想做乜都得。

「唉，而家搞啦啦隊果邊啲嘢好叻呀，你可唔可以得閒嚟陪下我呀？」

「我都有嘢做架，最多我借個膊頭比你，訓落嚟啦。」

點知佢真係成個人訓咗落去，壓住我個膊頭，痛到我唔想郁。

「康洛文，好嘢喎，咁都未訓得著。嚟，同我講下呢篇news article講咩。」

屌呀！你叫個唔訓嘅人答問題，無天理呀！

我攤起份報紙，睇一睇佢叫我睇嘅文章。呢篇文章用字對我嚟講相當淺，我估我F3個陣都睇得明。

「哦，篇article就講政府將會嚟新界北收地發展新市鎮，個作者認為政府應該做多啲諮詢同埋評估，聽多啲市民意見囉。就係咁喇吳sir。」

「Easy right? 你咁聰明，幫下你啲同學仔啦。」

就係咁，吳sir叫我完咗社足之後，得閒教下其他同學英文。屌，其實姐係自己教唔掂姐，做咩推個波比我姐？不過咁，其實有比多咗時間我同嘉瑜相處。

# 八

準備咗成個禮拜，差唔多到咗社際足球比賽嘅決賽。係我同申屠子成嘅決戰。雖然我而家應該唔需要再為咗博取莉曦嘅歡心而戰，但係為咗幫嘉瑜，同綠社，仲有藍社嘅榮譽，我點都要贏！

係決賽進行之前，先舉行藍社對綠社嘅季軍戰。我應承咗嘉瑜會嚟睇，順便幫下佢手做嘢。

「點呀，搞成點？」係佢忙緊啦啦隊一啲最後準備個陣，等我關心下我嘅嘉瑜。

「唔好搞我啦，我仲做緊嘢。」睇嚟佢幫緊佢嘅社員點名。

「咁我睇你表演囉啎！」既然佢咁講，我都有理佢。我坐咗係看台後面，睇住呢場季軍戰。

估唔到，我眼前呢個女仔，上一次比賽仲係一個同我有咩關係嘅同學，今日已經係我嘅女朋友。

藍社自從上場比我大炒六比零之後，聽講士氣受到嚴重打擊，龍門嘅白文翰好似因為咁而頹咗兩日，冇去練波。相反綠社上場同樣係輸波，但係打得唔差，都曾經同黃社打成均勢，再加上綠社啦啦隊係嘉瑜領導下，繼續佢哋嘅強勁氣勢，所以綠社球員嘅信心方面先勝一籌。

雖然佢哋今日唔係嚟爭冠軍，但係依然士氣高昂，唔知係咪因為有一個咁勤力，又靚嘅啦啦隊隊長呢？

好，唔講女。場波已經開始咗，綠社一如預期，獲得較多控球權，壓住藍社嚟打。唔夠5分鐘，綠社已經射咗三至四球。

終於，係賽事嘅第9分鐘，綠社前鋒譚兆倫頭槌建功，一比零領先。綠社看台上一片瘋狂，嘉瑜嗌到痴線。

我希望嘉瑜唔好咁快嗌爆喉嚨，因為我敢擔保，綠社入球陸續有嚟。

果然，藍社失咗一球之後，防線突然崩潰，俾人話扭就扭，白文翰救到頭幾球，救唔到跟住啲啲。上半場，綠社已經贏到三比零。

我趁中場休息個陣買多兩支水比嘉瑜，果然佢都嗌到失聲，係咁飲水。

我抱住佢條腰，「你唔好嗌咁多之好啎。」

「得...我冇嘢。」

當然，我唔比佢嗌到咁大聲，於是捉住佢，帶佢上看台上面，同我一齊坐。

「而家你坐係我隔離，你唔可以再嗌咯啎，唔係我聾架啦。」

結果，佢又唔知點解坐定定。就算下半場綠社入多一粒，佢都冇乜點嗌。不過，似係佢嗌唔出多啲。

最後，綠社以四比二擊敗藍社，獲得社足第三名。



綠社成班球員同幹事搵埋嘉瑜去慶功，但係佢唔去，話要同我一齊。

「傻豬，做咩唔去同佢哋食飯呀？我實搵到人陪我架。」

「唔得！你唔可以再搵其他人陪你！」

「陳天元都唔得？」

「唔得！」

我真係好好彩，點解我會有咁鍾意同我一齊嘅女朋友？

「嘉瑜，」

「做咩呀？」佢已經成個馴咗落我個膊頭度。

「我真係好鍾意你。」

「我都係。」

呢個時候，我嘅腦海浮現咗一段歌詞，我忍唔住唱咗出嚟。

<https://www.youtube.com/watch?v=ldOTcfTHMlg>

「能同途偶遇在這地球上 燃亮飄渺人生 我多麼夠運  
無人如你逗留我思潮上 從沒再疑問 這個世界好得很」

我嘅唱功應該唔算差，都玩過學校talent show，只可惜嘉瑜唔識欣賞，佢已經剋到馴著咗，睇嚟佢呢幾日真係好辛苦。

「唔好訓啦，瑜，  
我帶唔到你返屋企架...」

# 九

(唔好問我點解講咗冇，今日又有)

天色變得昏暗，我同嘉瑜已經坐左係到兩粒鐘。佢真係訓得好霖，完全冇想起身嘅跡象。佢嘅頭髮有一種獨特嘅香氣，香到我都唔知點形容。

嘉瑜已經壓住我個膊頭兩粒鐘，成隻手痺晒，今晚做咩嘢都唔可以用右手，係時候訓練我嘅左手。

我擺咗我部電話出嚟，影咗佢一張相，再擺上snapchat，打埋caption：「傻妹 訓咗兩粒鐘啦」

唔知係咪女人嘅第六感特別犀利，嘉瑜似乎知道我影咗佢相，終於起返身。

「好叻呀。吓！咁夜架啦！」

「八點鐘，唔好好夜姐。」

「唔。你個膊頭好舒服。」

「你唔好再挨落嚟喇，我成隻右手完全郁唔到，今晚打唔打到飛機都成問題。」講就咁講，我都幾享受比佢挨落嚟。

「康洛文，你答我，」嘉瑜突然變到好認真。「點解你有我喺度，你都要打飛機？」其實我哋一齊咗之後，我都冇再打過。

「你想嘅話，你可以幫我架。」我笑晒咁講。

佢突然塊面紅晒。「你...你真係想我幫你？」

佢好似真係想幫我？我哋一齊之後，佢都冇提起過任何性嘅嘢。

佢再補多句，「我屋企冇人。」

於是，半個鐘之後，我已經喺嘉瑜屋企。

我除咗我條褲，坐在喺嘉瑜隔離。我錫咗落去佢嘅咀唇上面，佢已經開始用手幫我套弄我嘅巨龍。

「哇，你條嘢咁長嘅...」

好明顯，佢係第一次做，雖然唔係好舒服，但係一個咁鐘意你嘅女仔，肯願意幫你打飛機，真係點都爽。

「如果你射嘅話，記得同我講。」

「嘉瑜，」我已經忍唔住。「我好愛你。」

「傻豬嚟嘅，我都愛你。」

我除咗佢件衫同褲，抱住佢條腰，順勢而上，摸住佢嘅胸。

嘉瑜完全冇反抗，「你好淫。」

「你都係呀，仆街。」

我哋兩個差唔多到高潮，「你冇帶套，唔好射落我到。」

「咁我射落邊度？」

我唯有射落佢身上面。佢嫌啲精污糟，去咗沖涼。

最後我都係忍唔住，入咗去廁所，再同佢做多一次。我哋兩個全身赤裸，毫無保留，嘉瑜已經將所有嘢比晒我。

如是者，我哋一晚搞咗三次，我將呢兩個月所有嘅慾望全部射晒出嚟。不過，我最後冇射係嘉瑜入面。我太愛佢，我唔忍心破壞佢嘅身體。

好彩第二日係星期六，我先可以係嘉瑜屋企到馴足成朝。睇嚟琴日做足三次對佢嚟講太叻，佢一馴，睇嚟冇2點都唔醒。於是我起左身之後，炒咗少少蛋俾佢，幫佢洗埋啲衫，寫低啲嘢之後就走咗。

「喂阿仔，琴晚打咗幾次俾你，你去左邊？」

「冇嘢嗰阿媽，去咗同學屋企，玩夜咗唔記得同你講姐。」

「下次同我講聲先，費事煮飯煮埋你個份。」

睇嚟世上除咗嘉瑜之外，對我最好嘅女人就係阿媽。

打咗一陣機之後，碌一碌手機，終於收到嘉瑜嘅whatsapp。

「啱啱起身>-<」成三點鐘至起身。

「photo」

「你隻蛋好好味呀！！！」

「photo」

「你洗衫冇落洗衣粉架！！！！仲係污糟嘅！！！！」

「覆我啦」

「打完機 做咩」我遲咗半粒鐘覆佢。

「今晚仲想唔想上嚟？我阿爸阿媽下星期先返」

「你條淫西」

覆完佢之後，我心裏面偷偷慶幸，我一定係前世做過咩好事，先會今世有咁好嘅女朋友。

我真係要珍惜佢。

<https://www.facebook.com/Jenmen-1568099093209378/>

## 九·一

( 之前原來出漏咗 sorry )

準備充足，萬眾期待嘅社際足球比賽決賽——紅社對黃社即將開始！

今次，我哋紅社決定用返同上一場一模一樣嘅陣容，務求再一次大勝而回。

我戴上隊長臂章。「Sky，有冇信心？」

「掂過碌蔗！」

「咁就最好。」

「嗌返聲先！紅社！」

「Red house！」

今日，紅社嘅看台唔單止有紅社社員嚟打氣，仲有一班由嘉瑜帶領，專誠嚟食花生嘅綠社人。

我同嘉瑜打咗個眼色，佢班friend即刻做嘢。「康洛文！康洛文！」

屌，爽到。唔講仲以為我打緊世界盃，爭在未有我嘅海報姐。

跟住嘅打氣，終於變返做正經啲。一邊大嗌紅社，一邊就嗌黃社。

不過最難做嘅，就係莉曦。一邊係佢嘅社，一邊有佢嘅男朋友，都唔知佢撐邊邊好。

兩隊球員列隊握手。我同申屠子成都係隊長，我同佢握手個陣，大家都不自覺咁握得最大力。

「祝你好運。」

「大家咁話。」

紅社對黃社，隨即開始！

黃社先開波。申屠大腳俾佢哋嘅中場，跟住一直控球在腳，好穩陣。但係比賽初段，大家都冇乜有威脅嘅攻勢，大家都只係互相試探一下。

過咗大概十分鐘，我鏟走咗黃社中場嘅波，發動攻勢。黃社嘅後防，甚至係申屠都反應唔切，機會嚟啦！

招牌禁區外重炮，董之英龍門都擋唔住，何況係黃社嘅龍門？

輕輕鬆鬆，一比零。看台上面繼續大嗌我嘅名。

「唔錯呀，我哋開始啦。」面對申屠嘅挑釁，我竟然有少少淆，始終，佢都好犀利。

果然，佢開始開turbo，插花插足三下，仲搞到天元成個仆咗落地。申屠話咁快已經進入單刀狀態。

我唔想咁快輸返一球，用盡力跑去禁區防守。

係我跑到佢身後嘅時候，佢大腳一抽！

好彩，我哋嘅龍門文以立伸盡手臂，掂到個波，個波再中柱出界，角球。

「立仔，好嘢。」

黃社即刻開個角球出嚟，我哋都仲未mark好人，所以走甩咗申屠。佢係門前一頂，立仔都反應唔切。

一比一，拳來腳往，相隔僅三分鐘。

我哋兩位只係稍微展現真正實力，就已經令到比賽變到好刺激。

我同申屠都大概知道對方嘅實力，就無謂再拖泥帶水，大家打得放好多。

我多咗係中場破壞對方攻勢，再放波比黃展賢。佢嘅速度可能仲快過我，係邊路不斷製造威脅。打打下，連陳天元到大發神威，不斷接應黃展賢出嘅高波，頭槌攻門，有一球甚至頂中楣。而黃社亦都拳拳到肉，申屠嘅插花，我哋點防都防唔住，好彩文以立上晒身，大大話話救咗五六球。

膠著情況有上半場帶落下半場。就算我哋雙方開始換人入嚟，戰況依然無乜大改變，比數維持係一比一。

去到比賽最後大概兩三分鐘左右，發生咗一件大事。

申屠突然訓低，原來佢賣老抽。睇嚟呢場比賽嘅體力消耗都好大。

「喂，你掂唔掂。」

佢似乎痛到連嘢都講唔到。於是，我幫佢拉下筋。

過咗一陣，佢嘅情況好返好多，可以企返起身。

我拍一拍佢膊頭。「大佬，唔好咁快死。冇你，唔好玩。」

不過，佢企就企到起身，但係都係就住就住，令我哋有機可乘。

我照樣放球長波比莫錦佳，佢再出高波。呢個時候，陳天元係禁區外飛奔入去，跳到盡，頂到個波，個波應聲入網！

二比一！無仇報！

我哋忍住唔慶祝住，返去防守。係申屠受傷嘅情況下，黃社冇辦法組織攻勢，再加上我哋嘅浪費時間戰術，戰況再有改變。

「嘩——」

冠軍！

我哋攞住天元慶祝。

「屌你老味！你條仆街平日唔入波，一入就冠軍！」

真不愧為大賽球員。

申屠再一次訓咗落地。我估佢頭先都係死頂。

莉曦即刻去睇下申屠。「你見點呀？」

「申屠子成，唔好死頂啦，我抬你返去。」

「唔使啦康洛文，我行得郁。」

「你行埋今日，聽日如果隻腳廢咗，唔關我事架。」

最後，我同莉曦扶住申屠，送佢返屋企。

我估成班友仔應該去咗新墟打邊爐慶祝，不過算，我至少將一個情敵，變成一個朋友。

# 十

之前英文吳sir叫我幫下其他同學手做功課，呢個計劃意外地獲得咗好多老師嘅支持，我都吹佢哋唔漲，唯有幫下手。

而家完咗社足，係時候要履行我嘅責任。

「喂，咁多位快手啲，早啲收工返歸！」

今日要交50條數，成班男人數底勁，唔使我教，好快搞掂。但係女仔除咗嘉瑜之外，其他都搞唔到，連角度都唔識計。

「...因為係三角形，所以姐係180度再減63度，咁等於117度，B囉。」

雖然我已經逐步逐步咁同佢哋解釋，但係我唔知佢哋聽得明幾多成。

尤其Yvonne，我覺得佢應該連F3數都唔識做。

「Yvonne 姐呀，你當畀我，做返一兩題好冇？」

「我方你個嘉瑜bb啲數咁好吖嘛！」

係呢，點解我個嘉瑜啲數咁好，可以快手快腳做完再枕低我？

「唉...好啦，今晚M記，我同莫嘉瑜試下幫你搞搞佢。你咁玩法，你 DSE 2啲個數就好難入大學。」

聽到入大學，Yvonne就好緊張，二話不說就應承我去補數。佢仲搵埋佢個好姊妹郭玲玉嚟，搞到我變咗補習天王。

我call咗嘉瑜十幾次都冇人聽，睇怕佢又去咗訓覺。

「咪瞓呀豬」

咁代表咗，我要一個人對住兩條煩膠，教佢哋做數。

好痛苦。

點都好，呢鋪我康洛文就小試牛刀。如果呢兩條友啲數咁屎，我都搞得掂，咁我仲唔係補習界明日之星？

我擺住係以前學校做落啲數，拎比Yvonne同郭玲玉做下。

「哇！咩黎架！」Yvonne睇到啲數，驚到嗌咗出聲。

「吓，基本sin cos tan嚟炸嗎。我仲有啲難少少嘅數比你哋做，但係都知你搞唔掂，遲啲先啦。」



「邊個話我搞唔掂！我張依韻就要至少擺返個4，點都要入大學！」好有鬥志，幾好。

數學擺4，講就容易，我做都容易，但係對於初中數學堂馴咗一半嘅張依韻嚟講，係一個艱鉅嘅任務。

於是，我就幫佢哋補數，補足四個鐘，教數熟到教到我覺得我應該兩粒星無難度。但係，Yvonne似乎冇乜進步，甚至係佢隔離嘅郭玲玉都開始做到幾題果陣，佢都仲未有基礎嘅概念。

「算啦，搵日再搞下，時間仲有嘅。」

嗰晚，郭玲玉send咗whatsapp比我。

「hi [laughcry] 我係serena 其實你教數都幾好haha  
至少我聽得明 yvonne佢應該係有啲心事 諗緊啲嘢 先會搞咁耐都搞唔掂」

吓？諗緊啲嘢？

「唔好介意我咁八卦 我想知佢諗緊啲咩」

「我都唔係好知 總之佢呢排心情都唔係幾好」

有啲唔係幾好嘅預感。

「咁算啦 你去開解下佢啦[laughcry] 我最關心嘅就係我幾時可以搞掂 唔駛教數姐」

Yvonne姐，唔好煩到我呀。

# 十一

自從果次 Serena 同我講關於 Yvonne 嘅嘢之後，我唔知係咪想關心下呢個朋友，就決定每日放學都幫 Yvonne 補數，順便畀機會我自己做熟啲數。每日補數，搞到我同嘉瑜相處嘅時間少咗好多。

「咁呢，呢兩隊三角形就congr... 全等嘅。所以呢兩條邊一樣，答案係C，50cm。」

係我地獄式（對我嚟講）嘅訓練底下，佢係最近一次數學quiz終於擺到四成。未去到我要嘅水準，但係已經係一個幾唔錯嘅成績。

「喂，Yvonne Cheung，見你咁勤力做數，quiz又終於有四成，今日我請你食」

「食咩？」Yvonne 對眼已經發緊光。

「食板燒雞腿包。」

「屌！算，好過冇。」

雖然佢係不屑我啲包，但係至少佢都幾開心，好過之前，唔再西口西面。

「屌你啲食相真係好搵核突。」

「唔鍾意咪唔好睇，叫你個嘉瑜姐姐過嚟囉！」

好，就聽你講，即刻叫佢過嚟。

「豬 過嚟m記啦」

「做咩？[laughcry]」

「好耐冇出過嚟啦」

咁樣，佢就應承咗我。

一出到嚟，望到我同 Yvonne 係度食包，嘉瑜忍唔住笑咗出聲。

「嗌咗好多嘢，見你咁鍾意食薯條，請你食啦。」

嘉瑜錫咗一啖落我塊面度。「咁識做，算你啦。」搞到係隔離嘅 Yvonne 好尷尬。

「好啦好啦，我唔阻兩位啦，我返去自己慢慢做下數。」

「喂，嘉瑜，橫掂嚟到，不如幫 Yvonne 做埋啲數啦？」

「好呀，聽晒你講。」真係乖。

結果，兩個人嘅補習班，變成咗三個人嘅補習班，兩個係度卿卿我我。

「點呀？sorry呀，冇冇悶親你？」

「冇呀。」

「唔好呃我啦，你個樣咁頹，做埋呢條走啦。」

我同嘉瑜講左兩句，佢就知我想做咩。

「行啦，我哋去吹下水。」我拉住 Yvonne 走。

我帶咗 Yvonne 去巴倫紐，仲請埋佢睇戲，我唔記得咗係啲咩戲，應該係復仇者聯盟。

「點解 Captain 可以咁靚仔？」

「係囉，點解我會靚仔過佢，都冇得拍戲？」

「屌你，收皮啦。」

「講笑姐，唔駛咁爛口嘅。點呀，睇完冇冇好返啲？」

「梗係好返，好返晒添呀！有人請啲！」

「咁不如你同我講，點解你呢幾日西我面？」

「劫囉。」

「唔好呃我。」

「好啦好啦，咩都比你睇到晒啦，名偵探柯南。我同你講啦，我比我條仔飛咗。」

我聽到之後，冇任何關心佢嘅意思。「屌！原來你有仔架？」

「屌你，我似冇咩？」

「你真係似！」

之後，佢終於同我講關於佢條仔嘅時。原來佢條仔係以前佢隔離學校啲人，拍咗拖半年左右。但係之後 Yvonne 要轉校，就開始關係變差。

唉，點解我會變咗做情緒輔導員架。

## 十二

「咁，你之後同你條仔搞成點？」

「無咩嘅，我哋咪見少咗，關係差咗。到咗上個禮拜，佢whatsapp我，話唔知點樣同我相處好，所以大家都係分開好啲。」

聽到 Yvonne 都會比人飛嘅事，我自己都有少少驚，好驚第時我同嘉瑜都會咁。

「咁而家有我呢個情緒輔導員同你輔導下，你有冇好返啲？」

「乜你有輔導過我咩？」我唯有苦笑。「不過，又真係好返啲嘅，多謝你。」

「唔好多謝我，多謝嘉瑜啦。佢肯比我出嚟，同你吹下水，佢先應該多謝。」

「係囉，咁你仲唔快啲返去錫下佢？佢呢幾日犧牲咗好多架，去搵佢啦，我冇事。」

張依韻，你真係掂。

我即刻whatsapp嘉瑜搵佢。過咗一陣佢終於覆咗。

「終於肯搵我啦咩」

「唔好嬲啦豬」

「好嬲呀 唔好搵我」

憑佢呢句「好嬲呀」，我就知嘉瑜一定冇嬲我。

「我同 Yvonne 傾完啦 最多我陪你去買嘢啦」

「算你啦」

你睇下？邊有嬲呀！

「喂喂喂你睇下！好靚呀個袋！」其實我真係唔知嗰個袋又有幾靚，但係只要佢開心，我就夠。

「你想要咩，咪買俾你囉。」

「乜你份人咁膚淺架！唔知用錢可唔可以買到你啲時間呢？」

「你想嘅話，唔使錢都可以有！」

「傻豬嚟嘅，你啲時間一早已經係我架啦！」

「唔係架，我啲時間仲要擺嚟幫你班好姊妹補全科架。」

「唔駛你麻煩啦，我哋諗住報燈塔學校，睇下koopa教數好啲定你教教得好啲囉。」

「唔係掛？擺我同佢比？我啲水準好明顯好過佢啦！唔係喇，如果你係嗰度聽唔明嘅話，記得搵番我，我教返啲實用啲嘅知識俾你。」

「唔使你啦！你要專注啲陪我，唔好再搞其他嘢啦。」

「傻妹！」

嗰晚，正當我打完兩場LOL，想馴返陣嘅時候，有個人打電話比我，原來係鄧國榮。

「喂阿文，我哋又有下一個社際比賽啦！今次希望都係你嘅強項啦。」

「今次又玩乜呀？社際籃球？」

「唔係，今次靜態啲，玩辯論比賽。」

「幾好呀，我講嘢都ok，你搵咗其他人未？」

「咁就梗係搵咗啦，不過你識嘅應該係得我同郭玲玉。」

「郭玲玉？Serena？」

「係呀，就係Serena。你唔知咩？佢以前係學校辯論隊係主辯嚟咯。」

「又真係睇唔出啲！咁實冇問題啦。下次meeting個陣見啦！」

估唔到呢間學校真係臥虎藏龍。咁多勁人，相信係呢間學校嘅生活只會越嚟越有趣。

我即刻 whatsapp 比 Serena。

「乜你原來咁勁 係辯論隊主編[laughcry]」

「失敬失敬 我點夠洛文兄你抽」

「點都好啦[laughcry] 我都會去辯論比賽 合作愉快」

我突然醒起啲嘢，我可以問下嘉瑜，chok下料，睇下綠社嗰邊會搵咩人。

「豬 綠社搵咗人去辯論未？」

「haha 你一定估唔到 我都有份！！」

「又真係估唔到啲 希望你到時唔好講講下離題俾人扣撚曬啲分[laughcry]」

嘉瑜都有份？我對綠社嘅勝算感到憂慮。



# 十三

「喂，記得聽日放學之後有meeting啫！」

「唔使驚啫，我實到。」

又要開始每日嘅玩社生活，雖然都幾辛苦，但係好刺激，好開心。有啲嘢要有付出，先會有令人難忘嘅收穫，係咪？

我放咗學之後，即刻執嘢，鎖書入locker，跑過去開會。

一開門，原來已經有人係度。

「乜你咁早呀康洛文？好彩我仲早過你。」

「Serena，乜你咁快到嘅。」

之後，其他人都陸續嚟到。

根據鄧國燊嘅講法，我哋會係今日之內知道我哋比賽嘅辯題同對手。所以我哋決定咗主副辯嘅人選先。

我提議 Serena，結果冇人反對。我就被揀中成為結辯，而兩個副辯就係兩個 Form 4 女仔，一個叫劉嘉希，一個叫王知秋。

「知秋，知秋，一葉知秋。好名好名！」唔該搵人比把扇我，唔講仲以為我係唐代大文豪。今天不小心把心愛的水杯...

雖然比我笑佢個名笑咗足足10分鐘，但係王知秋都冇乜點介意，嫣然一笑。

自從嘉瑜做咗我嘅女朋友之後，我每識到一個女仔，我就好自然咁將佢哋同嘉瑜比較，王知秋都唔例外。佢笑起上嚟比嘉瑜仲要靚，從佢充滿自信嘅笑容當中，就可以知道佢富有學識，真係有智慧，唔係好似嘉瑜咁蠢，傻下傻下同我係埋一齊。

點都好啦，嘉瑜係我心目中，依然係第二靚，僅次於莉曦。

「大佬，我哋工都分埋，連辯題都冇，好難做嘢啫。」

「唔好急啦洛文，應該差唔多有消息。」鄧國燊似乎冇擔心過。

呢個時候，竟然係陳天元打開房門。「燊爺！辯題出咗啦！對手係黃社！」

我哋同黃社嘅辯題係「香港體育行業應該商業化」，我哋做正方。

「社長哥哥，對條題目，你有無信心？」我同你講，我大把信心，呢條題目簡直係為我而設！

「你實有信心啦，你係精英運動員嚟個啲，應該好多睇法，仲可以用自己做例子，加晒分。」

講起條題目，我都有少少火滾。香港運動員絕對可以好似外國運動員咁，做到商業化。雖然我打學界個陣都有過贊助，但係如果成個行業可以有更多商業贊助，除咗多啲錢發展之外，我哋知名度亦都會提高。而家政府乜嘢都唔做，人哋都唔敢冒險投資，莫講話大富大貴，名利雙收，啲運動員就算連搵餐飯食都好難！

我意見係有好多，但係點樣將呢啲肺腑之言變成我嘅發言稿，就真係令我好頭痛。

「諗到idea未？洗唔洗我幫下你？」

「好呀，我好歡迎你嚟幫下我手架 Serena。」

於是，我同佢吹咗好耐水，講咗一啲我嘅idea，而佢將我對體育商業化嘅意見做咗啲整輯，擺咗落佢份稿到。

「你個立場幾好，應該好好講。而家我哋爭咁啲例子同數據，呢啲嘢，你同知秋搞咗佢啦，相信你都好快搞得掂。」

郭玲玉，你知唔知，我覺得你好犀利！」我好少覺得一個人犀利。

「唔好講笑啦，我係得辯論先叫擅長啲，我都未多謝你幫我補咗咁多日數添。」

「咩都好啦，而家最重要係搞掂個比賽佢。」



## 十四

「豬你哋社辯準備成點？」

「好好呀 贏is a must」

「係啲 你哋辯題係咩」

「政府應該增加免費電視牌照數量 正方」

認真，我覺得嘉瑜條題目仲好講過我嗰個。

「輕鬆啦 你係咪做主辯呢？定係副辯？」

「估錯咗 我咩都唔洗講 負責寫稿就ok」

「總算你有啲自知之明」

「而家我好失禮你咩？」

「唔係失禮我 係失禮成個社」

就係咁，佢黐咗我。

不過，佢黐我仲好，我可以專心執稿。

「知秋姐 我搵咗啲關於運動員薪酬嘅資料 你睇下啱唔啱使」

「thx 不過唔好姐姐聲咁叫我 我細過你[laughcry]」

「係啲 慣咗lol」

「不過你都唔好叫我妹妹[laughcry] 好難聽」

「okok」

「你啲料好ok呀 可以擺埋落rebuttal稿到 thankyou」

「搞掂就可以send比 Serena 啦」

傾完資料嘅問題之後，睇嚟嘉瑜仲黐緊我，今次耐咗啲，黐咗半個鐘。

都唔知佢黐咩？

嗰晚，我同王知秋執好晒啲資料之後，就一次過send晒比 Serena 睇。

「好快手 最鐘意呢啲效率高嘅partner」

「梗係啦 你嘅partner係我啫」

「係咩[smirk]」

「不過都要好嘅主辯」

「把口啣過油 唔驚嘉瑜嬲？」

「屌 咪提喇 佢而家好似真係嬲緊我」

「雖然唔知你哋搞乜嘢 不過丞下佢啦佬佬」

其實 Serena

講嘅嘢都有道理，話晒佢都係我嘅女朋友，唔可以得佢一個付出，我自己都要俾啲嘢佢。

「豬 sorry呀 我講笑架咋」

佢好快就覆咗我。「傻啦，你估我真係嬲咩[laughcry] 唔覆你都驚到咁」

屌！俾人fake咗！

跟住唔知點解，我應承咗佢，買個新嘅公仔畀佢。

「唔該。」我歎息一下，個公仔真係好貴！

「公仔呀公仔，點解你可以貴成咁，我呢個禮拜應該連飯都唔駛食呀。」

於是，我跟住嗰個禮拜，每一日都痴唔同人嘅餐。

「喂，請我食個餐啦申屠，呢排冇錢。」

「冇帶咁多錢出街，麥樂雞6件要唔要？」

「照殺。」

申屠捧著個餐兜，坐係我對面。

「點呀，呢排搞乜冇晒啲錢，過咗大海賭輸錢？」

「屌你啦，唔係。」

「唔係輸錢，咁姐係女人啦。嘉瑜姐咁大洗嘅？」

跟住，我就同佢講咗關於個公仔嘅事。

「噏，我都有女朋友，我都明你個難處。」

「唔係嗰，莉曦似係賢妻嚟個嗰，真係有我啲個咁大洗？」

「你有所不知喇，佢心細，但係食量大。我懷疑佢每日食嘅嘢比我仲要多。萬一要我請佢食嘢，咁到時要藹餐個個係我。」

「咁好似嘉瑜好啲嗰。」

「不過，呢啲錢係要洗下嘅，自己個老婆仔開心下，你都開心嘅，係咪？」

「我個荷包最唔開心。」

「算啦，呢啲返唔到轉頭架啦，你諗下點樣可以令嘉瑜唔再使你的啲錢啦。」

「唯有係咁。」

各位巴打，有冇咩拍拖慳錢大法？

順手like下：<https://www.facebook.com/Jenmen-1568099093209378/>

## 十五

過咗月尾，錢終於返嚟了。我幾驚老母唔比錢我，到時要出去返下part time至得。

同一時間，我哋社辯準備工作已經進行得如火如荼，每一日放咗學之後，大家就去m記搵好份稿。

「唔錯，可以改下啲字就最好。康洛文，rebuttal搞成點？」

郭玲玉呢條友真係好痴線，如果你同佢玩辯論，我勸你都係搵第二樣嘢同佢玩，你唔會夠佢做。

佢展現出平時唔會見到嘅領導能力，我同王知秋佢哋佩服到五體投地。

「er... 應該ok架啦，不過你睇下就穩陣啲。」

「好呀，比我望過。又幾ok喎，估唔到你寫稿都有一手。」

「係真唔係呀？你都讚我？咁我咪好犀利？」

「你連校際比賽都玩到添，不過唔係你勁，係我哋學校冇乜勁人。」

「乜你咁樣打擊我自信心架。」

「算啦，你本身都冇乜嫁啦！」連王知秋都加把口嚟笑我。

就係咁，本身應該好嚴肅認真嘅準備工作，每一次都會好歡樂咁結束。

我都幾羨慕

Serena，因為佢就係住友愛，可以係學校行返屋企，而每次都係得返我自己一個搭車返元朗。

「喂，康洛文。」

「做咩呀 Serena。」

「跟埋你一齊搭車？屌，咁驚做乜，我有嘢做要入元朗呀。」

「冇乜嘢，嚇一嚇姐，咪一齊囉。我坐輕鐵個喎，你唔介意？」

「是但啦。」

就係咁，佢坐咗係我隔離。

「你係邊個站落車架？」

「我去咗康樂路先，喺嗰度買啲嘢食，因為我阿媽少煮飯。」

「哦。康樂路，幾啱你呀。」

「屌。」

「咁你呢？」

講完，Serena 捱咗落我個膊頭度，瞓著咗。睇嚟佢呢幾日真係好忙，好叻。

「唔好瞓呀。」

一搭，就搭到去總站。去到呢度，我先夠膽吵醒佢。

「喂，起身啦。」

佢終於肯醒。

「我係咪瞓咗好耐。」

「係。到埋總站。」

「總站？sorry呀，阻到你。你唔係要去康樂路咩？」

「求其啦，呢度都買到嘢嘅姐。」

「點都好，sorry呀，我走先。」

佢擺埋佢個書包，衝咗出去，跟住我就唔知佢去咗邊。

返到屋企，我whatsapp Serena。

「點呀 你係咪呢幾日忙社辯叻得滯？洗唔洗我幫你搞掂啲稿？你瞓返一晚先啦。」

佢隔咗一陣覆返我。「我ok呀 不過你係咪想幫手 我可以比好多嘢你做」

「好呀 你比我做下啦 你啱番一晚 唔好死」

結果，佢send曬啲副辯嘅稿比我，叫我試下一晚之內執一執下佢。

鼎，又真係幾辛苦，我終於明白點解佢會咁叻。

嗰晚，我為咗第二日 Serena 唔好咁辛苦，我做到2點，終於執到份稿靚靚仔仔。

「咦？咁快搞掂啦。真係好快手，叻仔。」

「你唔駛check下咩？」

「唔駛啦，我信得過你，你嘅製成品應該都有一定水準。」

「多謝啲。」

「似乎今日到你有啲眼瞓，你都瞓下啦。」

「好呀。」

橫掂中史而家搞緊宋朝，我一早已經識咗，我就瞓足成堂中史。

咁我啲notes邊個幫我抄？梗係搵一個我幫過佢嘅人啦。

「張依韻，你咁忙嘅？」

「冇嘢呀，抄緊notes姐。你係咪想幫我抄埋呀？唉。」

## 十六

「都唔爭在喇，我呢排咁鬼忙，你得閒幫我抄下notes啦。」

「呀屌你，你洗人洗到咁盡嘅？」

「幫下我手啦，唔該。」

「唉好啦好啦，見你都叫做幫過我手，算啦。」

「多謝Yvonne姐！」

就係咁，我就可以係中史堂到瞓覺。

仲有一日就係社辯第一場比賽，雖然話我哋執稿已經執咗好幾個禮拜，但係我哋難免有少少緊張，郭玲玉都唔例外。

「同我再check多次。康洛文，幫我睇下，如果有任何point你覺得有機會俾人駁嘅話，即刻同我講，諗埋應對嘅稿。」

呢個時候，又係佢嘅領導能力，令到我哋好放心。

應該冇死啦呱？

「比賽同學，唔該去到301室集合。」

「你緊唔緊張呀？」我似乎好鍾意問人呢個問題。

「傻啦，我驚你緊張過我呀。」

「挑，郭玲玉，有你係度，我點會驚姐？」

「嘉瑜嬲啦。」

「頂。」

講就咁講，我一入到比賽嘅課室，我即刻擺咗支水，係咁飲，一飲飲咗半支。

係咁意講咗啲比賽規則之後，比賽正式開始。

應該係我太專注係份稿到，我一直都有留意對面黃社有咩人喺度，後來睇番，都有一個人識。

「.....我哋雙方今日嘅辯題係香港運動行業應該商業化，而我方係絕對同意呢個講法。首先.....」如果我講到好似做主辯嘅Serena咁有自信就好。

康洛文，你得嘅！

雙方都講左幾輪，而家到王知秋上場。

「.....剛才友方同學曾經提及過商業廣告係香港嘅市場成效唔大，呢一個範疇，我方認為係值得商榷。正如我方同學頭先提到.....」

王知秋同我一樣，都係有少少滂。

「喂，你好似講漏咗個point。」

「我知，但係唔夠時間。」

「得啦，我幫你睇下我講唔講到。」

「康洛文，唔好講！你講你自己嘅總結就夠。」係 Serena。

「但係唔講，我哋會少啲分...」

「你講咗，俾人扣得仲犀利！」

好啦，我聽你講。

「而家有請主方結辯同學發言。」

「唔好滂！滂我就笑鳩你！」

為咗唔好比 Serena 笑鳩，加油！



# 十七

我深呼吸一大啖氣，我見到 Serena 望住我，造口型叫我加油。

頂硬上！

「.....我地啱啱雙方都係頭先提及過好多論點，咁就不如等我為大家總結一下。」

「剛才我方同學都提及過，香港嘅運動行業如果可以得到商業化，將會獲得更加高嘅薪酬。」

死啦，我突然唔記得咗自己要講咩，唔通真係奶嘢？

我即刻九秒九睇返份稿，安心好多。

我繼續好順暢咁讀埋份稿。我見到前面評判老師嘅樣，應該都係對我嘅發言好滿意。

「.....唔通友方同學會想見到香港運動員就連一份穩定嘅收入都有？如果有一個可以維持正常生活嘅薪酬水平，體育訓練機構又收唔到足夠嘅資助，香港運動員又點樣可以係世界運動賽場上面追逐夢想？所以對於今日嘅議題，我方係絕對同意，多謝。」

啱啱好冇超時，我嘅發言就咁樣完結，亦代表今場比賽終於搞掂。

「你啱啱最後個段好有感染力。」Serena 似乎都好認同我嘅表現。

「由我把口講出嚟，係應該有說服力啲。」

「不過而家點，睇下評判點睇啦。」

「應該都ok掛？」

「又唔係咁講，今次對面係睇得出佢哋好有準備，尤其是個第一副辯，連稿都唔係幾駛睇。」

「不過我哋有你，郭玲玉喎。」

「咁我都輸過嘅。」

「信我，今次唔會。」

「係信都唔信你。」

「好喇唔好嘈，整間佢話你哋太嘈，扣我哋分就奶嘢架啦。」王知秋果然有智慧。

過咗一陣，兩個評判老師應該已經完成評分，工作人員將張分紙攤去核對。

「而家宣布比賽結果，」

「正方隊伍，紅社，所得分數為164.5分。」

「而反方隊伍，黃社，所得分數為150.5分。」

「換而言之，今場比賽，勝出隊伍為紅社。而最佳辯員則為紅社主辯同學郭玲玉。」

順順利利，晉級決賽。

「都話咗你信我就得架啦，而家咪贏咗囉，你又擺埋最佳辯員。」

「你條鸚鵡仔又比你符碌過到關個啲。」

「你唔信我就真係鸚鵡。」

「呀兩位，膠夠未呀。」

「未呀，知秋姑娘，請你行埋一邊，我哋兩個唔係人咁品。」

「咁你要唔要睇下另外個場嘅分數？」

「嘉瑜？」

我即刻行過去隔離班房，嗰度進行緊另外一場初賽。

嘉瑜就坐咗係觀眾席到，最得閒真係佢。

入面嘅氣氛都好嚴肅，應該係仲未公佈分數。

好喇，有動靜喇。

「而家宣布比賽結果，」

「正方隊伍，綠社，所得分數為161分。」

「而反方隊伍，藍社，所得分數為143.5分。」

「換而言之，今場比賽，勝出隊伍為綠社。而最佳辯員則為綠社結辯同學吳德言。」

咁姐係話，連嘉瑜都入到決賽。

我即刻走埋去嘉瑜到。「入決賽啲，開心仔。」

「你就開心！大把嘢寫，又唔使馴！」

「我陪你馴你會唔會好馴啲？」

「屌你啦。」



# 十八

( 試下兩日一更 希望大家唔好介意 )

「豬你係咪真係好叻啫 我陪下你啦」

「要寫稿 不了」

我又比嘉瑜請食檸檬。

真係奇怪，以前係嘉瑜佢掛住我，想搵我出去；而家反而係我方咗佢唔得，佢成日都唔得閒。

真係怪怪地，不過應該都係一陣嘅姐，完咗比賽就ok。

希望係。係我諗多咗姐。

「咁你快啲寫好稿囉嗰 等我可以見下你」

「傻啦 你日日返學都見到我架啦」

又好似係，不過我而家上堂，除咗寫下稿之外，就係瞓吓覺，又點會留意嘉瑜。

「對唔住呀 呢排好似唔係點理你咁」

「其實我都係 我哋兩個都忙 努力完 遲下再慢慢見啦[心]」

嘉瑜真係善解人意，我可以擁有佢，真係太好彩。

有時我都會諗我係咪襯唔上嘉瑜，有一次我仲同佢講，佢即刻就話：「我唔准你咁諗！我鍾意得你，你就唔會襯唔起我！」

佢越係咁講，我就越內疚。我究竟係咪係度浪費緊佢嘅時間？我真係唔係幾識點同佢相處。

算啦，唔好諗咁多，我唔想嘉瑜見到我咁諗嘢。如果佢真係見到嘅話，一定會嬲咗我。

我覺得，我要搵個人傾下。

搵邊個？佢？

唔好啦，唔好搵佢啦.....

但係唔搵佢，又可以搵邊個？

但係搵佢真係最好嗰.....

唉好啦好啦，搵佢啦，申屠兄。

「喂，有啲嘢想同你傾下。」

「做咩呀，同嘉瑜姐散咗呀？」

「屌，乜你份人咁陰毒架。」

「咁搵我做乜先得架。」

「有啲感情上嘅嘢，覺得你會俾到啲意見。」

「唔係散咗，咁會係咩嘢？」

「我覺得我同佢好似淡咗。」

「咁對對情侶都實係會咁嘅，一開始大家梗係好開心，好sweet，但係蜜月期一過就奶嘢。如果你哋捱得過，就通常都ok，可以一齊到好耐。」

「咁點先捱得過？」

「我估你覺得同嘉瑜淡咗，係因為你哋兩個都忙緊姐。過咗個比賽之後，你咪搵啲嘢同佢做下，或者之後放新年假同佢去下旅行囉，我之前都同我嗰個去咗轉韓國啦，開心死佢。」

「又好似幾好，等我諗下點樣做。」

「你話兩個人拍拍吓淡咗，我同我嗰個都試過，咁咪試下一齊創造啲好嘅記憶比佢囉。我上次同陳莉曦去首爾，佢係弘大食住嘢，我就笑鳩佢，我哋兩個都好開心架。」

「你嗰個，食嘢就開心，咁就易攞啦。但係我嗰件唔同呀，人哋才女嚟架嘛，好複雜，又唔知佢啱咩。」

「唉，我就唔知你哋兩個啲嘢啦，不過你條仆街都係返去寫吓稿啦，如果唔係到時決賽輸咗，要搵郭玲玉carry，我笑撚柒你呀。」

「多撚謝嘞，有你呢句，我一定贏得好好睇睇，唔好失禮你。」

雖然申屠比我嘅意見聽起上嚟好有用，但係實際執行上有難度。我真係唔知莫嘉瑜呢個人鍾意啲咩。

我究竟要點樣同佢一齊，我真係好想維持呢段關係。

## 十九

「係啲，決賽題目出左未。」我見到鄧國榮就即刻問佢呢樣嘢。

「唔，就快架啦。嗰邊仲未通知我。」

「如果出咗題目嘅話，你記得第一時間同我講啲，我而家恨比賽恨到出汁呀。」

「嘩，見你對比賽咁有熱誠，我到時就同你講。」

「咁唔該晒你喇啲。」

「唔駛，我都好樂意見到你咁落力。」

所以我成日話，佢真係一個好人，一個好學生，一個好領袖。

既然而家仲未有題目，咁姐係寫唔到稿啦，所以我決定做一樣我已經好耐冇做過嘅嘢：

聽書。

「喂，康洛文。」係Yvonne。

「做咩。」

「做咩今日咁好死，抄notes？」

「因為你啲notes好撚核突，我睇唔明。」

「我屌你啦，我啲notes咁靚，你唔識睇係你嘅問題。」

「唉當係我嘅問題喇，咁我而家自己抄notes，咪唔使煩到你囉。」

「好呀！加油呀！」

我真係好想一拳打鳩佢，但係我唔打女人。

佢都好似唔係女人嚟，好似係。

「屌邊個咁嘈嘈到我瞓覺？」陳天元都比我哋兩個嘈醒。

講到咁大聲，搞到教我哋maths嘅老麥都聽到。

「邊個講粗口？」

唉，呢隻死貓我幫你食咗佢。「係我呀麥sir，sorry。」

「文仔，講粗口唔啱，但係見你呢排肯交番晒啲功課，quiz仲有八成，我頭先就當聽唔到！下次唔好！」

好彩姐，呢次嘅賭博成功咗。

「Sky哥，整間請我食飯。」佢又訓著咗，屌。

冇計啦，兄債，就妹還咗佢。「曦姐，你阿哥爭我一餐飯，你今日請住我先，遲啲問佢擺返錢。」

「好呀，你想食乜嘢？」

「頹M。」

「不過我今日同申屠食啲，你介唔介意？」

「我要你餐飯姐，又唔係要你個人。」不過我真係想要你個人。

「嘻，」佢淺笑咗一下。「如果我唔係同佢一齊嘅話，您可以要我個人嘅。」

「你唔係玩我呀化？作笑話都唔係咁掛？」

「認真架。anyway，咁整間係咪去m記？」

唔通佢講嘅嘢係真？佢真係鐘意我？

頂，嘉瑜呀，點解你要今日出去比賽冇返，搞到情況咁尷尬架。

到咗食lunch個陣，除咗申屠初頭問咗幾句之後，我哋三個都一直好和平咁各有各食 - 當然，莉曦同申屠一齊食。

我擺住部手機，whatsapp嘉瑜。

「豬你而家係邊呀」

佢冇覆，睇嚟佢仲比緊賽。

我見住係我隔離嘅莉曦同申屠食嘢食到咁開心，我估，頭先應該都係我諗多咗姐，佢只不過係度講下笑。

希望係，我都唔想佢哋兩個有咩事。

## 二十

琴日夜晚，我終於收到社辯決賽嘅題目，「通識科應該定為選修科」，我哋係反方。

其他人似乎都係同一時間收到條題目，即刻喺whatsapp group到傾。

Serena：「記住我哋係反方 即係通識科應該係必修科」

我；「分工係咪同上次一樣？」

Serena：「玩下新意 見你牙尖嘴利 試下玩副辯 我玩結辯 再搵人玩埋啲兩個位佢」

我；「頂我上次表現出色 做咩冇得繼續玩結辯」

知秋；「表現出色？上次你驚到爭啲連稿都唔記得 lol」

我；「好囉 fine」

就係咁，我就俾人安排做咗副辯。

一收到題目，我就開始著手寫稿，再寫埋rebuttal。

好叻呀。

每一次我溫書或者寫稿，做到好叻嘅時候，我就好掛住嘉瑜。但係當我諗到佢都係同我做緊同樣嘅嘢，都係一樣捱緊眼瞓嘅時候，我就覺得好心酸。

呢個比賽快啲完啦，好冇？

「豬 你瞓未？」

「未呀」

「未就好喇 同我一齊探討吓條題目」

「你點睇呀hong sir」

「講就唔難嘅 搵料先係最難」

「+1」

「你都覺得唔難 咁真係幾簡單」

「你而家即係質疑我嘅能力姐？」

「唔夠膽」

「到時決賽 我贏is a must」

「咁大口氣」



「到時你咪知」

連嘉瑜都咁有信心，我唔可以放鬆，繼續備戰，如果唔係到時輸咗真係好柒。

呢個時候，有人whatsapp我。係Yvonne。

「知你呢排同Serena瘋狂備戰社辯好辛苦 所以我決定為你同佢特別提供\*全科notes\*服務  
你想要邊科嘅notes 我盡量上堂抄/問人借 就當係幫下你 順便幫自己溫下書 記得社辯要加油！！」

睇到呢段whatsapp，真係好窩心，估唔到會有一個人可以係你最需要嘅時候幫到你手。

我成日覺得，揸低左Yvonne個條友真係戇鳩。不過冇用啦，Yvonne經歷過呢段感情之後，似乎都唔想再搵第二個男仔，你而家返黎搵佢都冇用。

易慌張，我撐你架！

結果第二日我返學，見到Yvonne好努力咁抄notes。

「喂。」我走埋去。「抄緊邊科？」

「幫緊Serena抄緊bio，啱啱問白文翰借嘅。」

「如果我想要中史notes，你比唔比到我？」

「而家教明朝，easy啦，我幫你梗係冇問題。」

佢突然望住白文翰借比佢份notes，若有所思。「呢個究竟係e定a呀，屌。」

我望一望，笑咗出聲。「Diarrhea呀，e同a都有呀。知唔知點解呀？你平時做開啲嘢囉。」

「姐係咩呀屌。」

「肚屌呀哈哈！！！！」

「康洛文我屌你老母！」佢攞住份借返嚟嘅notes追住我嚟打。

唉，白文翰躺著也中槍，份notes就此遭殃。

不過，我都要多謝佢，至少佢間接幫咗我哋，多咗時間準備社辯。

## 二十一

而家，又有Yvonne姐幫手抄notes，我真係發咗達，日日上堂度稿，份稿一定會係驚天地，泣鬼神咁勁。

寫下寫下，開始覺得我應該可以應付到副辯呢個職位。而且我諗論點同論據駁人個方面都幾出色（人哋話嘅，係咪真係勁我唔知），所以我對自己都有少少信心。

不過比賽呢家嘢，冇話百分之一百會贏嘅，未落到場，會發生咩事都唔知。

「喂，文哥，今晚歐聯曼聯對拜仁，睇唔睇？」陳天元屋企又係村屋，有部大電視，好過睇imax。

「聽講你老豆老母唔嚟香港嘞，係咪上你屋企先？」

「梗係啦，我搵埋申屠同白文翰架啦。」

「申屠上你屋企搵你個妹姐。」

「屌。」

「咁如果我搵埋嘉瑜去o唔ok架？」

「佢肯去咪得囉。」

我即刻問我前面嘅嘉瑜。「喂，嘉瑜姐，你去唔去呀？」

「去睇波？ok呀。」

「我又要去！」

「Serena？你都有睇波嘅咩？」

「少少啦，不過最主要係想同你汁下份稿姐。」

「又要搞公事，唉。」我真係命苦，難得搵到嘉瑜一齊睇波，我都要用埋呢啲時間去做公事。

「你唔驚我聽晒你哋份稿咩？」嘉瑜即刻好得戚。

「係嘞，Serena，你要睇就唔好帶啲稿上嚟啦。」

「哦，好囉。」

都係嘉瑜醒目。

「喂，咁姐係你哋個個都去啦？我買定的嘢上嚟，其他你哋自己搞掂佢啦。」

就係咁，5B班最大睇波團上線啦。

我打個電話返屋企。「阿媽，我今晚要上同學屋企做project呀，今晚應該要通宵。」

「咁姐係唔返嚟食飯啦，咁我煮少份啦。」

「好，聽日見。」

老母真係好。

我，嘉瑜，Serena，白文翰，同埋Yvonne（唔知點解最後加入咗）就係學校附近食咗啲嘢，之後成班人喺兆康站都等等，等天元接我哋上去。

點知，天元突然打電話比我。「文哥，我有啲嘢做緊，你識路，你帶佢哋上嚟先啦。」

結果，我搵咗一陣路，先去到佢屋企。

上到去，見到天元係度執緊嘢。

「到啦？而家仲好早，眼瞓嘅入房訓下先，除咗最大個間房唔入得之外，其他隨便入。」

Serena第一個入去訓。「我頂唔順，瞓陣先，開波個陣叫我。」

「咁唔眼瞓啲啲呢？」

「過嚟啦文哥，我哋等埋申屠過嚟，早場有一場莫斯科對馬體會，直踩兩場。」

「好，challenge accepted。」

過咗冇幾耐，申屠都過埋嚟，再加上嘉瑜捱眼瞓都要同我睇，咁就四個齊腳，等第一場開波。

開波冇幾耐，馬體會已經壓住嚟打。

「屌！哥斯達呢球都唔入？冇人mark啲！」申屠睇到扯晒火。

我氣定神閒咁渣住罐雪碧。「係呀，應該比你射就會入，你去打馬體會啦。」

「佢哋肯請我，我咪去囉！」

最後，雖然哥斯達入返球，但係後防唔爭氣，失返一球，一比一打和，好彩馬體會一分都夠出線。

「屌七十分鐘打後馬體會條防線真係危到禁爆平安鐘。」申屠仲未回神。

「唔係個俄佬前鋒把握力差，馬體會一分都冇。」

吹吓吹吓，啲女人都開始醒，我哋一早開晒嘢食嘢飲迎接佢哋。

歐聯夜，實在太好玩。

## 二十二

「屌你快撚啲食啦，啲pizza凍撚晒。」天元好唔耐煩。

「頂鬼叫你唔肯而家叫外賣咩，掛住睇波。」Yvonne真係睬佢都傻，食野緊要啲。說時遲那時快，佢已經擺咗第二舊pizza。

我擺住兜肉醬意粉，坐係度睇住佢都為咗舊pizza而係到嘈，順便等場波開始。

好彩我唔食pizza姐，如果唔係陳天元屋企將會發生一場腥風血雨。

Serena 擺咗兜雞翼過嚟。「嘉瑜你食唔食嘢？」

「唔啦，冇乜胃口。」

我覺得唔係好對路，於是問一問佢：「係咪有啲咩唔舒服呀？」

「冇呀，ok呀。」

「你呃唔到我㗎啦，你肯定呢幾日搞社辯搞到劫得滯。嚟啦，入房訓。」

於是，我就抱住嘉瑜，抱佢入一間房到訓。

幫佢襟咗張被，點知佢成個細路仔咁，要我氹佢瞓覺。「唉，你真係麻煩。我要去睇波啦。」

我係佢面上面錫咗一啖，佢瞓咗都係咁靚。

「早抖啦傻妹。」我就出咗去。

「乜你個嘉瑜搞咁耐架？波都差唔多開囉嗰。」申屠申鳩我。

「咁你個曦姐呢？人影都冇嗰！」佢即刻俾我窒到冇聲出。

我開手機，睇一睇出場陣容。「屌你老母個莫耶斯，又出費蘭尼？我打中場都好過佢啦！」

「香港年輕中場新星，學界最有價值球員加盟曼聯，冇得諗嗰！」

「連你都覺得點掂，咁得啦，申屠你都過埋去，取代朗尼，同雲佩斯一齊做前鋒拍檔咪得囉。呢個陣，真係歐聯都有得擺。」

「乜咁睇得起我呀？睇波算喇。」呢個時候，場波已經開始咗。

拜仁雖然都肯定出線，但係始終贏面比較高，又冇理由唔贏埋佢。另一邊廂，曼聯至少要有分落袋，重要睇另一場比賽嘅結果，先知道可唔可以晉級。

所以一開波，曼聯就選擇防守，拜仁佔盡控球優勢。

Serena 好努力咁同 Yvonne 解釋緊場上面發生緊咩事，真係辛苦。

「喂，Yvonne，你知唔知佢哋場上面係踢緊一個波，唔係你嗰兩個波啫！」

佢聽到之後紅都面晒，「康洛文你條仆街仔！」之後就想追住我嚟打，但係費事俾人投訴我哋擾人清夢，就冇咗件事。

突然，曼聯搶到控球權，史摩寧傳比卡域克，之後打咗一次快速反擊，最後雲佩斯大腳抽入，曼聯領先一比零！

呢個賽果令到我哋都好震驚。身為獵狗嘅我甚至忍唔住要歡呼。

莫耶斯，你好嘢！我到而家都覺得你比人炒好唔抵。

之後，曼聯就縮得更加後，甚至平時都唔係好返嚟後半場嘅朗尼同雲佩斯，都變咗做防守中場。正如白文翰話齋，而家曼聯係打緊10-0-0戰術。亦即係泊大巴。

佢哋死守到半場，但係拜仁功力強橫，去到下半場，拜仁終於靠著洛賓的軌跡，一扭三再狂抽，追返一比一。

之後兩邊都陷入膠著，最後維持一比一嘅比數，各袋一分。

同一時間，另外一場比賽亦都打完，曼聯證實驚險以得失球差晉級。

美好嘅一天。

睇完場波之後，我真係好眼瞓，我終於明點解嘉瑜會咁唔舒服。

我係天元間房到攤咗個枕頭，同嘉瑜一齊訓。

「你好肥呀莫嘉瑜，比啲位我啦。」

雖然好迫，但係好暖。我好快就瞓著咗。

好彩整間唔使返學姐。

## 二十三

學期過咗一半，我發覺我自己已經好適應呢間新學校嘅生活。上堂好玩，老師又nice，社活動精彩，連功課壓力都唔算大，sba 都輕鬆 ko，仲有時間幫下 Yvonne 補習。

點解我唔早啲嚟呢到讀？咁就唔使嘅四年時間係嗰啲名校到，自己又唔係有咩得著。

講返補習嗰度，幫 Yvonne 補下補下，唔知係咪我嘅威力，佢 econ 同中史 quiz 成績似乎又真係有進步，甚至連中史呀 sir 都要係堂上面公開表揚佢。

「今次呢，最高分一定係文仔架啦，不過，我見依韻嘅成績都好有進步，值得我哋去讚下。」

「喂，Yvonne 姐，話就話唔收你錢姐，請食飯都好應該掛？」

「得啦得啦知你勁，單車都比你變左做摩托喇。不過話時話咁，你啲溫書方法咁有用，point 又準，你唔喺度讀書，都可以去燈塔嗰度做補習名師啫。」

「去燈塔做好似幾好，到時 LM Hong & his elite team 實有你份嘅！」

「屌，又自high。」

「咁你而家人唔入我個 elite team 先？見你之前幫我抄咗咁多份 notes，就送個優惠比你，補全科又點話。」

「你補我全科？好似幾正咁啫！等我叫埋 Serena 一齊報！」

「得！俾埋個新生優惠，買一送一！你哋今次坐五望星不是夢！」

就係咁，LM Hong & his elite team

真係正式成立。係5B班房，我開始開班授課。由最初一對二，去到過咗兩個禮拜之後嘅十幾人，全部係嚟補我嗰個名師嘅，甚至有隔離班嘅人走埋過嚟。我仲有下面一班 elite members - 即係嘉瑜（中文才女）同郭玲玉（英文星級導師），幫埋手做收生程序，政學生證，派 coupon...

所以，個陣時大考之前，我其實係幫緊差唔多廿個人溫書。

「各位，知道隔離班 maths 聽日 quiz，如果大家 pass 到嘅話，記得影番份卷上 whatsapp group 到，我哋會有專人通知你嚟同我影返張相架啦！」

「好呀！」隔離班有條友仔真係做咗我嘅信徒，冇記錯嘅話佢好似叫做列凱程。

呢個時候，有個女仔係出面，一直望住我哋。

「喂！喂叫你呀！」

我拍埋手掌叫住佢，佢先有反應。

「你係咪想嚟補下呀？」

「唔係...係，係呀！我係嚟補習架！」

我即刻叫佢入嚟搵個位坐低。

「你叫咩名？讀邊班？我真係唔係太熟你嘞。」

「我...我叫咗做石倩怡，係...係4A班！中四收唔收架？」

「中四？我哋呢度專補中五嗰嘢！」

少女臉上稍有失望。

「不過見你咁有誠意，等我諗下可以點樣搞你個特別案例。」

「真係嘅？聽講你以前係XBS到讀，好犀利嗰嘢！」

「係呀係呀就嚟全校都知。」



## 二十四

「喇！講明先，我本身就唔補中四嘅，不過見你咁想補，我有理由阻你學習嘅，係咪？所以，你就着數喇，你將會可以享受免費 LM Hong & his elite team 單對單試堂一星期，有中文才女同英文星級導師幫你補。滿意嘅，可以再落訂，即係請我食飯！」

「咁正？咁我就試一個禮拜堂喇啎！」倩怡笑到見牙唔見眼。

於是，我嗰陣除咗放學用個幾鐘時間，幫自己同一大班友仔溫書之外，夜晚六至八，就喺M記，或者去嘉瑜屋企，三對一同倩怡補下數同通識，倩怡同嘉瑜一樣，都有修Bio，嘉瑜就順便同佢補埋。有陣時係M記，我地三個幫倩怡補到興起嗰陣，會有其他學校嘅人坐係隔離到聽，仲試過有mk係咁裝Serena

對長腿，比我怒啤咗五分鐘；有毒擦見我同女女補習，對我做出妒忌嘅表情，對此我就唔知點做好。

冇幾耐，倩怡已經對我地嘅服務好滿意，好快已經請我地食飯。

不過，有一日，好似係星期五，當我地呢個 elite team 又出動幫倩怡補習嘅時候，比我撞到個老朋友。

「喂文仔！咁多女仔嘅？」

M記玻璃窗出面傳嚟熟悉嘅聲音，坐喺窗口位嘅我即刻擰轉頭望出去。

「麥sir？」

冇錯，就係我嘅XBS嗰陣嘅訓導，麥sir。

麥sir

可以話係重新定義咗我對訓導嘅形象。喺成間XBS入面，佢應該係唯一一個由始至終都保我，或者叫支持我嘅老師。可能係佢做咗我一年班主任，知道我成就究竟可以去到邊，所以先至咁撐我。

但係冇計，嗰次我比人屈得幾嚴重，再加上本身我個底都係花，佢想保我都冇用，佢只能夠跟規矩做嘢。

不過都好，逃離呢間所謂名校，好過冇。

同三個女仔介紹咗麥sir 之後，我就諗住同麥sir 敘吓舊。

「係啎，點解老麥你會喺度？」

「哦，我有個朋友今日請我去呢度對面間酒樓飲吓茶。你知我㗎喇，唔係太熟屯門，咪早啲入嚟囉，估唔到比我撞到你。」麥sir 著住一套好普通嘅 polo 衫，似乎嗰日嘅聚會都係敘舊性質居多。

「自從我退咗學之後，我都係第一次見你，之前話咩要同你出嚟食吓嘢，都冇咗件事。」

「做咩事咁忙呀，掛住追女仔？」

「女朋友已經有喇，嗰邊綠色風騷嗰個。今日只不過係幫吓女同學補習咁解姐。」

「犀利啫，睇嚟你嚟咗涼糖清爽之後，做咗山寨王，反而修心養性啫！」

「你嗰句山寨王算點先？」我笑笑口咁，飲咗手上面嗰杯咖啡。

「唔係咩？你班同學以前嗰間學校，都只不過係 band 2 尾，band 3 頭啲咋。以你係 XBS 四年嚟嘅水準，你隨時下年就係準狀元，做狀元都唔算好難，勤力少少就得啲喇。你而家係一間 band 3 地區學校，真係甘心咩？」

的確，我一直冇諗過呢個問題。我其實一直當呢間新學校係我嘅休息站，其實我有冇諗自己嘅未來？

## 二十五

「文仔，我知道你可以去得更遠，去到最 top 嗰班。不過，如果你真係想休息一下嘅，麥 sir 都會尊重你嘅決定。」

「其實麥 sir，我個底咁花，又可以去到邊到？我入到嚟涼中已經好好彩。」

「又唔係咁講嘅，你真係想嘅話，我同學校嗰邊再傾吓，出多封推薦信，證明你操行有改善又唔算好難，你出聲就得。」

我低頭沉思咗一陣，歎咗一吓氣。

「麥 sir，你比我少少時間我諗吓。」

「好，你諗好嘅話 call 我，或者比個 whatsapp 我都得。記住，麥 sir 唔係迫你，如果你覺得喺到讀係開心嘅話，你唔一定要轉嘅，最重要係你鍾唔鍾意。」

「多謝你，麥 sir。」

「唔洗多謝。同理，以後你行街撞到我，叫我老麥就得啦，我都唔再係你呀 sir 喇。」

「都係一句姐。」

之後，佢就走咗去對面酒樓飲茶。一個五十幾歲嘅中年人，行步路都輕鬆過人，反而係我呢個十七八歲嘅後生仔，嗰一晚掛住諗佢比我嘅問題，心情似乎變得沉重好多。

我一直好相信老麥所講嘅嘢，我係可以去到更加高嘅成就。我喺中四嗰年，做到XBS足球隊正選，仲做埋學界MVP，當時已經有職業隊邀請我去試腳，甚至做職業足球員。如果唔係年尾冇喇喇比人屈我打交，我估我應該做咗港超聯球員，打緊職業隊。

諗到呢到，我先覺得，原來我仲好鍾意踢波。如果我要係足球上面有發展，咁我問老麥攞返封信，再去報董之英，或者乜嘢國際學校就得，橫掂英文都ok。

但係，係我身邊嘅，係嘉瑜。

我問自己，我真係可以因為踢波而放低佢？

我放唔低佢。但係我真係好想踢波。

於是，我最後諗到個方法：既然兩者都放唔低，why not both?

第二日，我就同足球隊教練報名加入。

「見到你個cv，我估我都唔洗要你試吓腳。」

「咁就好喇。我估我只要操一操，就可以落場㗎喇。」

「好，咁記得聽日嚟訓練。」

## 二十六

第二日，我就跟住陳天元，去咗附近一個七人足球場，去同足球隊訓練。

足球隊教練吳 sir 似乎同我一見如故，一見到我就同我不斷好興奮咁喺度傾偈。

「你知唔知呀康洛文，有你嘅加入，我哋嘅實力一定會有所提升！」

「唔好咁講啦吳 sir，我盡到我嘅能力，幫到學校贏波就得架喇。」

「好！我好欣賞你嘅態度！天元，學下人咗啦！」

Sky 哥躺著也中槍。

「我哋球隊其實以屯門區嚟講，實力其實都唔錯，就算而家我哋係十六強，晉級機會都唔細。申屠間唔中會出去比賽，一剔盃都有玩過；莫錦佳速度咁快，護波能力又強，大部分同齡對手都 mark 唔住佢。不過講到尾，我哋都係爭咁個可以係中場派牌，做到輸送嘅球員。」

吳 sir 對住我微笑，「而你，就係呢個10號位嘅最佳人選。我已經睇咗好多段 Youtube 嘅精華片喇，你絕對適合我哋球隊嘅打法。」

既然連教練都對我咁有信心，我有理由唔信自己嘅！

第一次訓練，我已經好快獲得隊友嘅信任。而且，我同莫錦佳自從社足之後，越嚟越合拍，我哋兩個之間開始建立到默契，好多時只要我比一球長傳，佢就會識走位接應，兩三腳就可以穿破防線。

完咗訓練之後，我就去問吳 sir：「之前都唔記得問，我哋下一場學界係幾時？」

「咪就係下個禮拜，我哋對可藝。」

原來下一場比賽咁近，我決定跟住嗰個禮拜，加強訓練強度，希望冇踢半年，狀態唔會跌得太犀利。

「喂豬 今晚去唔去跑下步」

我知嘉瑜都幾鍾意做運動，我估佢都應承。

「ho ar」

結果，係跟住嗰個禮拜，我每晚幫成班同學溫書之後，就即刻食飯，再去練跑練返至少一個鐘。喺嗰陣時，我連 FIFA 同 CSGO 都冇玩，晚晚都有多姿多采嘅生活。

「亞仔，其實你叻唔叻？」有一晚，阿媽突然問我。「你晚晚都咁多嘢做，你頂唔頂得順？」

「阿媽，你想我將啲精力擺去同人打交，定係好似而家咁，又溫書又去下踢波？」

「咁你而家又真係生性咗嘅。至少我唔洗隔個禮拜又去見你嗰個麥 sir。」

講到呢度，我又諗起麥 sir 同我講嘅嘢。我係咪真係要成世困係屯門？

不過，我心意已決，我要留係呢度，證明比嗰班所謂名校仔睇，我哋都好掂！

呢一個信念，令我每一次練波，每一次幫人溫書都充滿力量，為咗自己，為咗其他人，點都要做到成績出嚟！

第二日返學，我即刻問成班同學：「喂，聽日我哋學界比賽，你哋嚟唔嚟睇？」

「嚟！你落場就嚟！」

「咁你嚟硬喇，我肯定正選上場，唔正選都後備落場打返廿分鐘。」

「涼中球王，啪啪啪！」申屠呢啲咪叫識英雄重英雄囉！

經過一個朝頭早嘅努力，有成廿零三十個人會嚟睇。

「我哋要將兆麟場變做我哋涼中嘅主場，好唔好？」

## 二十七

打開屋企嘅鞋櫃，擺返呢對成年都冇乜著過嘅波鞋。

我記得，記得我點樣著住呢對鞋，一嘢射破董之英嘅大門，幫學校贏到精英賽冠軍。

雖然獎牌真係屋企嘅櫃都，不過，往事始終要拋低。因為，我要展開人生嘅新一頁。

我覺得，我正式唔當呢間中學，係我嘅休息點；佢係我重新出發嘅地方。

為咗更快重拾狀態，我係比賽之前三個鐘，已經係運動場隔離跑圈。

見住成班隊友慢慢帶住我哋嘅同學嚟到，我感覺到我嘅鬥志，正係我嘅心裏面燃燒。

「喂，球王！」係 Yvonne，佢拉埋成班姊妹，一齊嚟支持我哋。「你今場一定要贏到啲，你贏唔到唔好返嚟！」

「通常你咁講呢，我哋就會輸架啦，我哋盡力啦。」

「屌你啦。」

換返上一身裝備，我哋全隊步出球場。

「今次呢場波，對手雖然有實力，但係我哋只要盡全力，要贏唔係好難。大家落到場，盡全力好唔好？」

呢句，係我嘅肺腑之言。

「好！！！」

今場，紅社三人組 - 陳天元，莫錦佳同黃展賢打三箭頭。申屠，我同綠社嘅譚兆倫打中場中。

係吳 sir 嘅戰術底下，我係打一個比較墮後嘅位置，暫時負責做多啲防守，因為防守係我哋較弱嘅一環。

一開波，我哋就開始撇住攻，以兩翼嘅速度，加上申屠同譚兆倫嘅後上射門能力，仲有看台上面有成三十條友仔為我哋吶喊助威，已經做成對面龍門好大威脅，基本上唔需要我上前幫手進攻，我可以專心防守。

果然，我哋強橫嘅攻擊力，終於令我哋好快取得優勢。申屠禁區外插兩下花，好似撚狗咁撚，再放直線比黃展賢，黃展賢不負所託，直情扭過埋龍門再射入！

但係，正如蘇格蘭足球天才莫耶斯所講，「領先一球永遠是最危險的」。我哋唔知攻好定守好，仲比對面搶到幾次機會，好彩有白文翰保住後方。

似乎，我嘅機會嚟啦。

「倫哥，你墮後，我上前。」

「食粥食飯睇你啦。」

上返上進攻中場嘅位置，我可以盡情釋放我嘅能力。擺到波之後，我即刻彈俾陳天元。而佢都好識做，同我做個 one two，咁就過咗兩個守衛。

跟住，就係我招牌重炮射球出場嘅時候啦。

擺好角度，一射，網都穿！

「二比零！！」

入咗第二粒，我哋就安心好多啦。鍾意可以壓上少少，見唔對路可以縮後守，對面冇我哋符。

就係咁，上半場帶住兩球優勢，下半場我再入一粒，再加上申屠一扭三嘅入波，同埋白文翰一球神救，我哋十六強戰以四比零勝出。

努力真係冇白費，我向我嘅目標，踏出咗第一步。

比賽完咗之後，我哋全隊同其他未走嘅同學一齊去附近大牌檔食嘢。

「喂呢，你頭先嗰球砲彈式射球，又真係幾犀利喎。以為你上次社足符籙入姐，今次又入多次！」Yvonne 仲係度回味緊我嘅入球。

「梗係啦，你估我學界MVP個名托架？」

「其實，點解你係XBS撈得咁掂，點解你要嚟呢度讀？」Serena 好奇一問。

「邊有撈得掂呀。」講到呢度，我就好感慨。

「嘩，似乎有啲名校內幕消息喎。」

「申屠，唔好睇得多 facebook 個名校 secret，就當自己好熟名校先得架。如果你想知嘅話，我講下都冇妨嘅。」



## 二十八

係申屠嘅不斷追問下，我終於係個一晚，同我所有嘅同學解釋一次，點解我會離開，應該話係俾人係XBS踢走，跟住去到涼糖清爽呢間 band 3 學校讀書嘅原因。

我由我 F1

開始講起，話說我果陣，啱啱入到去呢間名校，心諗自己小學成績咁好，入到嚟應該冇太大問題，可以跟得到掛。

結果，又真係跟得到。除咗第一次考試唔係咁熟個考試玩法，考好似唔知第五定第六之外，F1去到F4所有考試都係頭三。

係F1嗰年，因為我成績都叫做出眾，而且我本身間小學實力麻麻，所以老師見我出身咁特別，所以都好留意我。其中一個，就係老麥，亦即係我F1嘅班主任。

名校成績頭三名，又踢到下波，照咁睇，應該係天之驕子掛？

今次，我就冇咁好彩喇。

係呢間學校裏面，大部分嘅人似乎有一種排外嘅意識。呢班人大部分都係係直屬小學嗰度升上嚟，唔知直屬小學係咪佢咁作為藍血人嘅象徵。佢咁似乎覺得，要係呢間學校到讀，一定要血統純正，出身正統。雖然，呢班人平時會分做唔同嘅小圈子，但係如果有其他人企圖破壞呢個系統，就會突然「團結」起嚟，攜手鬥垮呢個敵人，就算呢個敵人本身冇任何敵意，甚至想釋出善意。

我記得係我第二次考試考到第一，而且係足球隊有立足之地之後，開始有人想同我打好關係。冇記錯嘅話，最開頭係一個女仔嚟，名唔重要，嗰條友仔我直接叫佢做「八婆」就算喇，因為佢真係一個八婆樣，講嘢八婆聲，睇埋晒啲八婆嘢。

個陣調位，老麥安排佢坐我隔離，我呢一世應該會最恨佢呢個決定，因為呢條八婆開始咗我三年半嘅惡夢。

換完位之後第一堂，八婆已經開始撩我講嘢：「喂文仔呀，我想問你之前考試係點溫書架？」

「我冇乜溫書方法嗰啲。同理，唔好叫我文仔，叫返我全名就得架啦。」

跟住，我就聽到佢用超能力，係好細聲，但係我又可以聽得到嘅聲線講咗一句：「屌，懶係勁。」

我果陣時對佢咁嘅所作所為其實冇咩反應。我仲係覺得，係呢間學校，只要我不犯人，人就會不犯我，大家好好地讀埋書，日後好相見。

點知，事實將我呢個小小嘅幻想擊沉，將我同我嘅天真打落萬劫不復嘅深淵，再有翻身之力。

過咗一個禮拜之後，八婆繼續想盡辦法撩我傾計。雖然我知道佢已經開始好唔耐煩，但係我依然冇乜點理佢。

果然，最後一次嘗試都失敗之後，佢終於開始發爛渣：「呀康生，你係咪咁串呀！我哋想認識下你姐

· 你洗唔洗咁囂張呀？」

「如果你覺得我咁樣係囂張嘅話，咁不如你返去自己諗下自己發生咗咩問題。」

「你！」八婆比我激到冇嘢好講，唯有 call 埋佢班 frd 過嚟，圍住我張枱。如果唔係老麥早咗入嚟課室備課，我估我應該比書扑頭。

之後，老麥同我講咗兩句，真係兩句，內容都係叫我注意下人際關係。跟住去到 F3 嗰年，我哋先有多啲接觸。

八婆努力未果，比老麥調走咗。但係之後，換嚟嘅都唔係咩善男信女。

「hi，我叫麥...」

「我知，考第二個個麥思宏丫嘛。聽講你數學好勁個嗰，你可唔可以教下我？」想當年，我嘅數都仲係麻麻。

「好呀，咁你教返我英文轉頭？」

講真，我到而家都覺得呢個人好 nice，不過佢嘅一刻足以破壞我對佢嘅遐想。

最近首飲歌：

[https://www.youtube.com/watch?v=\\_mDxcDjg9P4](https://www.youtube.com/watch?v=_mDxcDjg9P4)

## 二十九

唔知老麥係咪特別關照同姓嘅人，總之佢個陣時好鐘意呢個麥思宏。班長比佢做，成日叫佢答問題。我估老麥調佢同我坐，就係因為我同八婆之前個單嘢。

呢個麥思宏，都係個句啦，其實幾 nice，不過幾 nice 都好，都係扮出嚟。

喺個陣時，當我同八婆單嘢揚到全班，甚至全級都知道嘅時候，我突然成為咗呢班藍血貴族嘅公敵。比人反枱，玩書包，幾小學雞嘅嘢都做得出。雖然我係足球隊同社嘅高 form 師兄師姐都叫做係背後支持我，同老師反映過問題，但係 form 1 從來都係一個冇王管嘅地方，規矩唔識守，人情世故又唔明，小學雞行為都係搵唔甩。

我心諗：大佬呀，入得嚟呢間學校，好心就唔好咁惹鳩啦。又要人唔好叫你做小學雞，自己又唔係特別成熟。

如是者，我同呢班惹鳩仔嘅緊張關係持續咗大概一個月。喺呢一個月裏面，我盡量嘗試忍耐，祈求會有人睇到問題存在。

有一日，我依舊都係比人撚狗咁撚。四五個好似係 form 2 嘅男仔用言語同肢體攻擊我，我個書包又比人當做波咁玩。嗰啲人我稱佢哋為死士，佢哋好似係比八婆一個靚女 friend 收咗兵，佢哋恃住自己 form 2，就以為自己搵到 form 1 妹妹好威水，就乜嘢都肯為佢做。殊不知，呢條臭雞已經係籃球場隔離，同籃球隊大師兄一齊玩緊。

呢個時候，麥思宏衝入班房，嗌咗一句：「停手。」

「你邊位呀？」

「唔洗理，總知呀琳搵你哋。」

聽到娘娘搵佢地，呢班狗公緊係即刻衝出去。但係聽聞，佢哋係大師兄面前，變咗做龜公，柒到冇眼睇。

「你有冇事？」佢捉住我隻手扶起我。

「ok 呀，慣咗。」

「你唔好介意，佢地喺咁啱啦。」

「我明嘅。」我到而家都唔知點解會爆咗呢句嘢出嚟。

「唔好理佢地，我帶你搵麥 sir。」

# 三十

自此之後，呢個班長就接受咗老麥嘅任務，開始乜都幫我手。小至借筆，大至趕走嚟串鳩我嘅蝦兵蟹將。個陣時，如果唔係佢成日幫我擋住個班人，我估我應該差唔多去自殺。

但係，呢個麥思宏，從來都唔係一個好人。

應該話，佢只不過係一班仆街裏面，冇咁仆街嘅人。

「康洛文呀，你等我一陣，我去搵麥 sir 擺啲嘢先，整間再教你數。」佢一支箭咁行出去。

等咗一陣，我突然覺得有啲急，所以行咗出去班房，諗住去廁所解決。

點知，比我見到麥思宏，同另外一班人一齊。兩邊似係傾緊一啲嘢，而另一班人之中，冇八婆。

「班長，你個邊搞成點？」

「咪都係咁。不過，你真係覺得咁樣係好？」

「你唔好唔記得佢係邊度嚟至得架！佢嗰！」

麥思宏好激氣：「我梗係記得啦！但係，你唔知咩叫反作用力咩？你施加壓力越大，你受返嘅力只會更大。我地玩太大，最後唔會係好事。玩夠就收啦，好冇？」

「講到尾，你都只不過係唔想賴屎上身姐！你唔想玩落去就出聲啦！」

八婆拉埋佢班朋黨離開現場。而我終於知道，其實麥思宏都係呢班藍血貴族嘅一員。

但係我唔怪佢。至少佢係呢個已經接近失控嘅情況底下，嘗試維持自己嘅地位之餘，亦都保持人類應有嘅理智。

而佢都做得好成功，令我有一刻相信過佢，相信呢個問題會可以解決到。

麥思宏並唔知道我聽到佢地之間嘅對話，而我亦都冇同佢講。佢照樣幫我，我照單全收。咁唔代表我認同佢嘅行為，只不過我唔想佢難做姐。

自此之後，我任何人都唔信。只有自己先可以保護到自己，要幫助嘅，就搵運氣。

個班契弟一嚟，我冇再捱打，而係自衛反擊。佢玩我書包，我直接攞佢春袋，就係咁簡單。

去到 form

2，佢地終於唔夠打，停止對我嘅戰爭。我似乎獲得勝利，但係兩年以嚟嘅慘烈戰爭已經令我臭名遠播。我獲唔到應有嘅尊重，只有追求暴力。去到當日我比人踢人出校嗰日，現實先再一次整醒我。

「就係咁。」

申屠即刻拍一拍我膊頭：「你真係堅勁。比着我都未必有咁嘅膽量。」

Yvonne 甚至聽到眼濕濕：「康洛文，估唔到你受過咁嘅經歷。」

「而家都冇嘢啦。喺呢到，我似乎搵得返我嘅地位。」

「冇錯，你幫咗我地好多。」陳天元難得正經。「你又幫我地補習，又捱義氣，而且唔會囂張。」

「唔好咁講，係你地改變咗我。你地令到我搵到人生嘅意義。如果我冇嚟到呢間學校，我估我仲係喺街邊同人開緊片，等比人打死。」

「咁講嘅話，文哥你要請我地食飯啦！」

「屌你啦申屠。咁講嘅話，今日我嗰球入波，你全隊都要請我食飯啦！」

( 鍾意嘅，記得追稿！ )

# 三十一

( 一路走來，並不容易。如果呢一刻嘅你仲有睇緊呢個故嘅話，我 Jenmen 衷心感謝你。 )

坦誠相對，先至係朋友相處之道。呢班友仔似乎感覺到，我真真正正當咗佢哋係朋友，之後都各自講咗自己嘅故事出嚟。

當中最好笑，令我記到而家嘅，一定係申屠點樣追到陳莉曦。

「我呢，其實份人就比較怕醜嘅。」申屠笑笑口咁講。

「你份人怕醜，怕條撚咩！你怕醜嘅話，我咪係梁振英？」

「你咪唔好信囉洛文哥。至少我去到F3之前，我份人面皮都仲係厚。我追呀曦個陣，都好撚驚。」

話說當年F2，當呢班友仔仲係喺另一間學校嘅時候。陳莉曦第一次同申屠。當年真係小毒撚嘅申屠對呢個跌入凡間嘅天使（根據佢自己嘅描述）一見鍾情，心諗一定要追呢個女仔。

但係，喺先先講完佢係毒撚嚟架嘛，咁佢係點樣最後成功追到女神呢？

「喇，就好簡單嘅：」

首先，因為佢同陳天元都一齊入咗足球隊。申屠冇嘢叻，最叻就係帶住個波，一扭十。咁喺，第一次訓練，莉曦嚟咗諗住睇佢呀哥表演下；又咁喺，申屠同陳天元係分咗練習打對頭。於是，係佢嘅女神面前，申屠示範點樣係二十分鐘之內，連續扭過同一條友差唔多十幾次。

「之後，我請咗 Sky 哥食幾餐飯。但係呢幾餐飯都抵，換嚟嘅係曦姐開始留意到有一條毒撚，叫做申屠子成。」

「嘩，咁你個戀愛故事都幾勵志下啫。相比嚟講，我嗰個真係好簡單，自己送上門。」

「得喇，知你勁啦。」

傾下傾下，嗰晚大家食完飯，仲直落去市中心 Oldway 唱K。

酒肉朋友，係你最成功嘅時候，手指連腳趾都數唔晒；知心好友，係你落難嘅時候，十個都未必有一個。好慶幸，呢班俾人睇死嘅 band 3 仔女，冇睇死自己，仲對一個外來人咁友善。

嗰啲自稱係未來精英，社會棟樑嘅人，其實係幾咁扭曲人性。以自己嘅利益為先，見到有任何會損害到佢哋利益或者地位嘅嘢，無論對方有幾咁無辜都好，佢哋都會用最強嘅力量，將對方擊潰。我真係唔明，反而係社會差唔多最底層嘅呢班「差」學生，雖然有好多嘢唔到佢哋決定，但係仗義多為屠狗輩，呢班人反而先係最有良心，最有義氣嘅人。畢竟，佢哋已經冇利益可以失去，計較亦無用。

但係，係呢個社會裡裏面，似乎只有計較得失，先能夠成功，做到成功人士。

我已經分唔清之間嘅因果關係。

無論如何，我身為兩個世界都身處過嘅人，我始終覺得，我有責任同佢哋，做一啲人哋認為佢做唔到嘅嘢。

為咗自己也好，為咗嘉瑜也好，為咗紅社也好，為咗足球隊也好，呢個已經成為咗我嘅目標。

## 三十二

話咁快，又去到大考。佢哋成班溫足通宵，但係我可以照樣十二點前瞓，最多都係溫多一陣，去到十二點半。

第一日考嘅係中文，亦都係我唯一一科都唔係幾幫到佢哋手嘅科目，畢竟自己都唔係中文好勁，可能隨時差過嘉瑜。

冇計，既然自己都唔係好掂，咪唯有同大家一齊溫書。

「喺，今次我自己都未必搞得掂㗎，唔好話幫你哋喇。我哋倒不如去補 yy 算。」

「吓，我覺得 yy 講啲嘢好廢咋㗎。」

「咁呀莫嘉瑜小姐，唔通你有乜嘢神奇嘅惡補中文方法？過兩招嚟好㗎！」

「妖，簡單啦。下個禮拜考中文呀嘛，你哋日日嚟我屋企，我有少少中文心得分享下比你哋，到時你哋中文實有進步。」

其他人對嘉瑜講嘅嘢半信半疑，但係橫掂我中文本身個分都唔差，補 yy 都只不過想睇下會唔會有進步，咁倒不如唔好俾錢燈塔學校賺，擺啲時間幫襯下嘉瑜。

我問申屠：「喂，佢啲嘢，信唔信得過㗎？」

「其他嘢我唔夠膽擔保，你都知架喇。但係，中文呢樣嘢，我覺得應該冇乜問題。」

第二日，我，Serena，申屠同埋另外三四個人，就去咗嘉瑜屋企，睇下佢究竟有啲咩神奇嘅方法，可以起死回生。

「喺！其實呢，個方法真係好簡單嘅姐。」佢指住擺係佢枱上面嘅一大疊試卷。「每人擺一份先。」

「除咗康洛文之外，我估大家仲記得邊個係何志敏架喇？」

其他人聽到呢個名之後，都忍唔住笑咗出聲。

我問：「佢係邊個？」

「佢係我哋以前間中學嘅中文科主任，冇跟埋過嚟教。我哋 form 3 個年，佢教我哋中文，但係成日上堂就係到講笑話，大部分人都覺得佢好廢。」

「咁佢真係廢呀嘛！」申屠一出，全場爆笑。

「咁佢又唔係真係咁廢嘅。」嘉瑜係櫃桶裏面擺出一本筆記簿。「我個陣中文考得幾好，以 band 3 嚟講成績好好，所以佢話幫我額外補下習，仲教咗我好多幾實用嘅技巧。」

我哋每人擺咗一份 past paper，嘉瑜就開始講佢本筆記簿上面寫低嘅技巧。



「見唔見到條作文題目？雖然條題目好短，但係可以拆咗做幾個部份。呢幾個部分，我叫佢做取材同主旨。」

我突然醒起，我仲係 XBS

讀緊個陣，都好似有個老師教過類似嘅嘢，但係我個陣都係冇專心聽書，睇嚟而家要再努力少少。

「我講咁多，你哋其實明唔明？」唔經唔覺，原來嘉瑜一講講咗成個幾鐘。

「我其實明嘅。」似乎全場淨係得 Serena 同我一樣明白。

「我 get 唔到。」Yvonne 雙眼流露住近乎絕望嘅眼神。

「其實收到收唔到，真係唔係靠彩數。」嘉瑜全身都充滿住自信。「既然大家都好似唔係好明，咁倒不如我哋一齊溫下其他科。」

結果，本身係中文探索之旅，變咗做溫習團。係之後果幾日，我哋都有共識咁去到嘉瑜屋企到溫書，嗰度似乎變咗做我哋嘅溫習勝地。不過，通常我同嘉瑜係溫完書之後，都會有一啲後續活動。

# 三十三

第一日大考，相信所有人嘅心情都係緊張，成個禮堂就充滿住不安嘅氣氛。

呢個時候，有一個神情從容嘅仔，聽著音樂，走入禮堂。

冇錯，嗰個咁搵打嘅仔，就係我。

「屌，第一日考中文，輕鬆啦！」

「仔，咁撚臭串？」申屠仲擺住本書，氣起勢咁樣刨。

「梗係！我康洛文嚟個嗰！」

果然，收到份試卷之後，望住試卷上面嘅題目，我用返嘉瑜教我嘅方法去拆解題目，的確係對我理解成篇文章有好大作用。

「輕鬆啦。」

漫長嘅中文卷考完之後，我哋決定出嚟食嘢。

「頭先份卷，其實唔難。」

嘉瑜和應我嘅講法。「我都係咁話。」

「我跟咗你之前教我嘅做法，的確成分卷易明咗。」

「哈哈，都話咗中文係我強項架啦！」嘉瑜再一次笑到見牙唔見眼。

「不過，過咗今日之後，就係我嘅天下喇！」

「屌你返去真係唔撚洗溫書個嗰。」Yvonne 啱啱好食完碗麵，即係連珠爆發。

「呢啲你哋恨唔到架啦。」

「家下名校仔好叻咩？」

「Yvonne 姐呀，我冇讀名校好耐架啦，同埋我真係唔想再同嗰班人再有任何關係。」

Yvonne 似乎知道自己講錯嘢：「對唔住，我唔係有心嘅。」

我即刻緩解返個氣氛：「唔緊要，唔好介懷。」

我哋食完嘢之後，再一次上去嘉瑜屋企溫書，不過今次嘅名師，就唔係嘉瑜，而係我。

「好喇，聽日我哋考嘅就係數學。我之前吹水都有講過，我 form 1

個陣數學其實麻麻地，不過之後我搵到方法去改善，就係操。如果你唔係天才，一望就識條題目嘅話，咁樣你唯一可以做嘅就係不停操數。」

「咁呀康sir，今日我哋係咪做好多份past paper？」

「係呀申屠同學，但係我哋唔係計時做，因為我發現大家好多連基本嘅 concept 都仲未打好，莫講話係高分喇。咁樣嘅話，倒不如我攤份 past paper 出嚟，俾少少時間你哋做，然後我逐題解俾你哋聽。」

我發現我真係好鍾意做數，尤其當我成功解決到一條數嘅時候，個種成功感係好特別，冇辦法被取替。

「噏，我估你哋都唔撻記得咩嘢係 log 架啦，我而家同你解返。」

我望一望嘉瑜份試卷。

「咦？莫小姐，你啲數進步咗喎！估唔到你連呢題都識做。」

「梗係！有你呢個名師指導呀嘛！」

「真係識講嘢姐豬。」

「嘩，唔好係我哋面前放閃呀。」Yvonne 頂唔順了。

## 三十四

之後嗰幾日嘅考試，由於對我嚟講實在太過輕鬆，都冇乜提及嘅價值，總之就係用一半時間做完份卷，然後用一半時間發下吡啲，唔知做咩好，鬼叫考試規矩寫明唔比人早走咩。

做數學卷嗰陣，我大概用咗個零鐘就做晒份 paper

1。連卷都check咗幾次，確認自己冇咩錯之後，就開始無所事事。可能監考老師都知道我不屑去出貓，所以佢都冇乜巡過我坐嗰行，走去巡嗰啲出貓慣犯聚集嘅地方。確認咗監考老師唔會望過嚟或者行過嚟之後，我就開始四圍望。第一個梗係望坐我隔離行嘅嘉瑜啦，見佢應該仲係Section A2嗰題圓形角度到掙扎緊，不斷喺個圓形上面畫嘢同搵cal；我嗰陣真係有一個衝動，想喺個位到大啖「唔好做住先啦，以你嘅智慧而家搞唔掂㗎啦，去下一題啦」，但係我最後都冇咁做。

當嘉瑜冇乜嘢好望，跟住我就望吓坐前一個位嘅

Yvonne。佢應該仲做得慢過嘉瑜，但係見到佢真係好努力咁解緊條題目，雖然我唔清楚，但係應該係嗰條體積題。話就話冇人做數會唔努力，如果唔係點做到條數，但係要知道 Yvonne 係三個月前仲係成份數學卷連兩成都未必擺到嘅人口嚟，所以而家佢竟然可以做到去呢個程度嘅題目，作為佢半個數學補習老師嘅我，心裏面或多或少都有啲欣慰，Yvonne 終於百屌成材。不過佢都可以係呃我，一飛就飛到去中間嘅題目嘅。

所以完咗數學考試之後我就去咗問 Yvonne，睇吓佢係咪真係呃我。

「乜我似啲會自己呃自己嘅人咩？何況我唔做前面啲題目先，我會連嗰兩成嘅分都冇，到時肯定仆街。」

「咁我對你又好有信心嘅，至少我知道你會肯搏下，睇吓可唔可以創造奇跡。」

「自欺就只會欺埋人嘅姐，我自己有幾多料我心中有數，我好清楚我比你教完之後，我嘅數學程度的確提升咗唔少。」

監考老師擺住我哋啱啱做完嘅嗰疊卷離開試場，同喺門口嘅我同 Yvonne 點頭示意。

我指住擺住試卷嘅老師，同 Yvonne

講：「如果你嗰份卷真係有四成嘅話，咁你真係要請返我食飯。」

Yvonne

好誇張咁打咗個突。「乜考試呢啲嘢唔係老師獎勵學生嘅咩？做咩家下要嗰學生請返老師轉頭？」

「喂大佬，你去燈塔報個 course 都要幾舊水啦，你請返餐飯比我同嘉瑜咪當交學費囉，好著數㗎啦。」

「哦！仲要我請埋你個女朋友呀？我真係冇咁多財力去請人食飯呀康師父。」

「我唔理呀，派卷嗰日記得帶夠錢啦。」講完我即刻掉頭走。

「喂康洛文！」

